




DS
796
H2H75
1731
v.11



西湖志卷之二十四

物產

明聖之瑞肇應金牛是知一物雖微莫不涵泳太平承符德化其所格被者深也西湖山輝水媚品彙滋繁洪惟

聖澤覃敷是以庶類咸若觀百昌之暢遂益徵太和之翔洽己志物產

穀品

鮑家田稻

咸淳臨安志鮑家田在錢塘門外東山

街之北有玉泉水灌溉吳越王相鮑君福賜田於

錢塘至今名焉

吳廉靜鮑家田詩搖旆家家酒扶犁處處村草深迷井口槿密擁籬

根綠水明秧本青山失燒痕多應忌蠶事畏客掩柴門

八卦田稻

西湖遊覽志宋耜田在天龍寺下中阜

規圓環以溝塍作八卦狀俗稱九宮八卦田至今

不紊

馬龍標西湖竹枝詞八卦田中學種秧

麥嶺麥

成化杭州府志大小二麥嶺舊多種麥

王墳豆

紫桃軒雜綴南屏山邵皇親墳左側有地

產蠶豆顆大而味鮮杭人呼爲王墳豆

汪懋麟酒舍詩酒舍

爭傳段七孃王墳小豆摘新嘗春
殘花事都無了別有幽芳出院牆

木品

九里松

武林舊事九里松唐刺史袁仁敬守杭日

植松於左右各三行靈隱寺志唐九里松今將千

歲大者五六人抱虬枝偃蹇龍幹攫挐爲海內異

觀數年之間所存略盡山後桐村塢土穀祠有松

六株甚奇古好事者欲觀九里舊松於此訪之可

也

鄧林九里松詩松是山靈一手栽堯天長就棟

梁材龍髯怒起春風急似怪遊人喝道來夏言

九里松詩

百盤雲磴八千峰飛蓋行穿夾道松長

晝風雷驚虎豹半空鱗甲舞蛟龍江濤夜合秋聲

壯湖雨春添黛色濃欲藉丹青圖直幹恨無韋偃
得相從王世貞九里松詩偃蓋垂髯一萬株鬱葱
佳氣冠江湖長依漢地三天竺不數秦時五大夫
永夜濤聲遙自合高秋嶺色未全孤無勞白眼輕
人世雨後芝
苓好更鋤

南屏松

淨慈寺志南屏臨湖一帶自長橋至太子

灣舊名南新路夾路多長松幾五里許蒼翠與袁
仁敬所栽九里相掩映間有枯菱明初寺僧夷簡
及諸好事者補植之

萬松嶺松

方輿勝覽萬松嶺夾道栽松西湖志類

鈔萬松嶺多巨松在唐時已有之矣白樂天夜歸

詩云萬株松樹青山上十里沙堤明月中南宋時
密邇大內碧瓦紅簷鱗次櫛比今平爲大塗而松
亦無幾咸淳臨安志白公詩拂城松樹一千株指
萬松嶺言今多不存

國朝雍正八年總督

臣

李衛以茲嶺爲省城來脈所關

宜植蔭木且爲南北上下通衢亦資蔭暍因補種
萬株蒼翠夾道漸復舊觀

雲居寺桐

雲居寺志唐時寺內有桐一本白香山

有詩

白居易雲居寺孤桐詩一株青玉立千葉綠
雲委亭亭五丈餘高意猶未已山僧年九十

清淨老不死自云手種時一顆青桐子直從萌芽
拔高自毫末始四面無附枝中心有通理寄言立
身者孤直
當如此

楓木塢楓

咸淳臨安志

楓木塢舊多楓木故名

郭祥

正楓樹林詩

一塢藏深林楓葉飄

蜀錦寄語別家人路遙霜霰凜

雙檜

靈隱寺志雙檜峰上有雙檜望之如蓋

藥王樹

靈隱寺志在靈隱山門外大三圍乃香樟

也有僧過之曰此藥王樹可治心疾

青林巖櫨

靈隱寺志青林巖多櫨桂木葉常青凌

冬不凋故曰青林

斷橋柳

湖山勝槩段家橋萬柳如雲

白居易楊柳枝詞蘇州楊

柳任君誇更有錢塘勝館娃若解多情尋小小綠楊深處是蘇家葛天民湖上觀柳偶記龍泉先生勾春柳一絲之句感而有述詩斷槎無葉又無枝得似勾春柳一絲不是畫船樓泊處白鷗飛下立時多

柳洲柳

廣羣芳譜西湖北山有柳洲亭南渡後自

湧金至錢塘沿城五里堤岸徧插垂柳故名

貢性之湧

金門見柳詩湧金門外柳垂金三日不來成綠陰折取一枝入城去教人知道已春深

蘇堤柳

西湖遊覽志蘇公堤夾植花柳歲久弗治

成化已前楊孟瑛闢之列插萬柳頓復舊觀久之

柳敗而稀嘉靖十二年縣令王鉞令小罪可宥者

得雜植桃柳爲贖自是紅翠爛盈燦如錦帶矣王

西湖柳詩

堤上千枝復萬枝春來誰不繫相思西

湖多少堪栽樹却種柔條引別離吳擴賦得西湖

新柳詩裊裊六橋春依依萬樹新似縈離別恨如

待冶遊人殢雨柔條怯含煙翠色勻笛聞心易折

睂盡夢難真映水嬌歌扇飛花襍

舞塵風光邁劉阮何必問桃津

三橋柳

西溪梵隱志

西溪有三橋多植柳濃陰夾

道又金四姥橋下垂柳獨盛

湖田桑

環湖沿山之田民多種桑

施肩吾春日錢塘雜興詩酒姥

溪頭桑裊裊錢塘郭外柳穆穆路

逢鄰婦遙相問小小如今學養蠶

土檀香

上天竺山志土檀香乃樺樹根香極清遠

椶櫚

武林舊事

慈雲嶺滿山皆椶櫚

無根藤

靈隱寺志往往被牆無根自茂

花品

孤山梅

萬曆杭州府志孤山故多梅爲林處士放

鶴之地今梅徑梅塢尚存剥落荒蘚者殆不下數

百年物也芸林詩話孤山梅花雖以和靖得名然

白樂天有憶杭州梅花詩則自唐時已賞鑒矣遂

昌雜錄孤山之陰一亭在高阜上曰歲寒繚亭皆

古梅西湖遊覽志至元間儒學提舉余謙旣葺處

士之墓復植梅數百本於山構梅亭於其下

張鼎孤山

種梅序夫人標物異物借人靈古往而今自來風
光無盡景遷而人不改興會常新是知有補斯完
無虧不滿誰非造化轉水光山色於眼前繁彼人
功留雪月風花於本地維昔孤山逸老曾於瀛嶼
栽梅偃伏千枝淡蕩寒嵐之月峻增數樹留連野
水之烟自鶴去而人不還乃山空而種亦少庾嶺
之春久寂羅浮之夢不來雖走馬征輿鬧前堤之
景色奈暗香疎影辜此夜之清光是以同社諸君
子點綴冰花補苴玉樹種不移於海外勝已集於
山中灌巖隙而長玉龍紛披偃仰壘澗濶而棲白
鳳布置橫斜幽心扶瘦骨同妍冷趣值寒枝共遠
西泠橋畔重開元圃印清波六一泉邊載起瓊樓
邀皓月非惟借風霜之伴與岸花江柳鬪風光亦
將留山澤之臞令溪飲巖居生氣色倘高人扶筇

掃石正堪讀易說詩若韻士載酒飛觥亦足吟風
弄月使千古勝場不逾寂寞將六堤佳境盡入包
羅豈獨處士之功臣抑亦坡仙之勝友余薄游湖
上緬想孤踪策月下之驢爲問山中誰是主指雲
間之鶴來看亭畔幾枝花爰快述其良圖用同貽
於好事云爾白居易憶杭州梅花因叙舊遊寄蕭
協律詩三年閑悶在餘杭曾爲梅花醉幾場伍相
廟邊繁似雪孤山園裏麗如妝蹋隨遊騎心長惜
折贈佳人手亦香賞自初開直至落歡因小飲便
成狂薛劉相次埋新壠沈謝雙飛憶故鄉歌伴酒
徒零散盡唯慚頭白老蕭郎林逋山園小梅詩二
首衆芳搖落獨暄妍占斷風情向小園疎影橫斜
水清淺暗香浮動月黃昏霜禽欲下先偷眼粉蝶
如知合斷魂幸有微吟可相狎不須檀板共金樽
剪綃零碎點酥乾向背依稀畫亦難日薄縱甘春
至晚霜深應怯夜來寒澄鮮祗共鄰僧惜冷落猶
嫌俗客看憶着江南舊行路酒旗斜拂墮吟鞍周
紫芝次韻仲平陳郎中孤山見梅詩綠髮朱顏日

枯槁心向梅花自傾倒誰知更有少陵翁江上情
多被花惱三年家住孤山下玉樹瀕湖得春早山
高有月韵最勝水近無風香亦好凌霜我欲念花
寒對酒花應憐客老孤芳一別今幾時更恐山林
跡如掃十年清夢竟成空遺恨此生常草草醉挽
芳條欲問誰滿挹清尊酌碧昊又次韻陳郎中再
賦孤山梅詩南枝先回北枝槁玉山誰向花前倒
庾郎已老怕愁多何郎憐花爲誰惱今年冬溫得
雪遲西湖地勝著花早舊時處士作詩處籬落橫
枝爲誰好清霜點樹月滿枝白雪堆花門不掃麗
句能爲鐵石腸賴有廣平文獨老借令一笑有餘
妍能此新詩不須草歸尋手種桃李花痛剪繁枝
投有昊朱南杰孤山觀梅詩費盡年年造化功精
神全在雪霜中一枝映帶牕前月消得逋仙作主
翁王冕素梅詩樹頭歷歷見明珠底用題詩問老
逋且買金陵秋露白小舟載月過西湖西湖湖上
水如天狂客長吟夜不眠騎鶴歸來清興好梅花
無影月娟娟斷雲流水孤山路看得春風幾樹花

騎鶴歸來城郭是月明簫管是誰家疎花冷蕊依
寒水瑪瑙坡前春獨回却憶去年風雪裏吹簫曾
棹酒船來月明曾過西湖路愛看橫枝當水斜試
問玉堂諸學士幾時清夢到山家明月滿天霜氣
重梅花風韻更清妍鶴飛不帶簫聲遠春過西泠
第二船一樹橫斜白玉條春風吹亂雪飄飄孤山
老却林和靖多載笙歌過六橋溪谷冰霜春到遲
老夫長夜祇吟詩憑誰說與中朝士此是江南第
一枝又咏紅梅詩昔醉西湖處士家酒旗吹上水
邊花東風蛺蝶迷清夢一樹珊瑚月影斜夏正探
孤山梅花詩種梅凡幾樹結屋可三間人老花長
好香清夢亦閒雪深門靜掩月冷鶴飛還瀛嶼人
間世神仙海上山李演問梅孤山調寄聲聲慢詞
輕羈繡谷柔屐烟堤六年遺賞新續小舫重來惟
有寒沙鷗熟徘徊舊情易冷但溶溶翠波如縠愁
望遠任雲銷月老暮山自綠顰笑人生悲樂且聽
我樽前漁歌樵曲舊閣塵封長得樹陰如屋淒涼
五橋歸路載寒秀一枝疎玉翠袖薄晚無言空倚

修竹張翥孤山問梅調寄木蘭花慢詞愛西湖千
樹曾幾度為攜尊向柳外停撓苔邊待鶴酒熟詩
溫瀛洲舊時月色悵荒涼惟有數枝存天上梨花
成夢江南桃葉移根如今憔悴客愁村難返暗香
魂甚歲晚春遲角寒笛曉雪暗雲昏登臨不堪寄
目但青山影影月紛紛再約與君同醉從他啄木
門敲

蟠桃梅

李仁山詞註蟠桃梅來自杭和靖詩句得

於孤山也

白璞李仁山檻中蟠桃梅調寄南鄉子詞前村瀟灑雪徑人回駕一檻誰移春

造化鬱鬱香浮月下青綾半護冰姿宛然臨水開時說與綠毛么鳳不妨倒挂斜枝

南山早梅

石湖梅譜錢塘湖上有一種開尤早余

嘗重陽日親折之

范成大九月十日南山見梅詩五斗留連首屢回來尋南澗濯

塵埃春風直恐淵明
去借與橫枝對鞠開

青蒂梅

四朝聞見錄光堯親祀南郊因過易安齋

爲賦梅巖詩嘗問主僧云此梅喚作甚梅僧對曰
青蒂梅又問曰梅邊有藤喚作甚對曰萬歲藤

天竺梅

萬曆杭州府志西湖之梅邇來頗不甚多

惟九里松抵天竺路幾萬株俗稱梅園他處雖繁

皆莫踰此

葛天民憶竺澗梅詩根在巖邊結枝從
水際橫此花殊近道凡木欠修行密雪

籠幽片疎篁倚瘦莖那時香不淺憶我話無生毛
澤民浣溪沙詞并序初春泛舟時北山積雪盈尺
而水南梅盛開水北烟寒雪似梅水南梅鬬雪千
堆月明南北兩瑤臺雲近恰如天上坐龜清疑向

北邊來梅花
多處載春回

千葉梅

錢塘縣志梅花天竺爲最盛有千葉梅重

臺梅

西溪梅

蕭士瑋南歸日錄西溪十八里皆種梅趾

目所向無非梅者中有梅泉從地湧出作梅花瓣
若可拾掇釋眞一梅譜法華自方井以西石人嶺
下以東縱橫十餘里皆有梅其成林而情景足媚
人意人一見之即拊掌懽呼稱賞者尤在嶽廟之
西法華亭之東與予所居龍歸塢南北村落之間

爲更盛其梅列爲三等爲老梅中梅嫩梅至今日
法華之成林可觀者皆已接之梅也自十年二十
年已上者斷其中腰取已接梅樹上嫩枝接其本
間掩以土裹以竹籜不一月而嫩枝生然須春時
發生之候其接木之人亦須少年有旺氣者若老
年衰殘人便少生意梅在三十年以上者便不堪
接接亦多不活土人稱未接梅爲野梅已接梅爲

家梅

馮夢禎西山看梅記武林梅花最盛者法華
山上下十里如雪馬德樹西溪探梅詩露浸

東湖一杯酒相送西溪幾回首中宵伐鼓出郊原
月在船頭烟在柳石橋竹墅舊往還夢魂先繞秦

亭山行迴百轉迎清旭鶯啼清早開人顏千樹萬
樹色皓皓高枝低枝盡蒼老如濤噴雪搖晴空如
龍蟠泥見鱗爪遊人多點壽陽妝輕裾十里吹暗
香粉蝶翩躚霜蕊舞滿山石髮俱清涼窮歷幽林
愁日落榻借青岑俯層閣浮生心賞人百不能得
一花下應須飲十日微醉溪灣月伴衾再起看花
聲瑟瑟

永興寺綠萼梅

西溪百詠序永興寺萬曆初馮太

史開之手植綠萼梅春時盛開車馬絡繹釋大善

詩云斷尾螺池留勝蹟綠英梅閣集嘉賓

李日華永興寺

雙梅爲先師馮具區手植詩琳宮雙瓊樹手植華
陽仙譚唾綴珠點文情浮玉煙光白定僧起夢香
高士眠孤山根脉在相爲保芳妍

萬松嶺蠟梅

咸淳臨安志此花有數種以檀心磬

口者爲佳蘇軾詩君不見萬松嶺上黃千葉玉蕊
檀心兩奇絕

馬塍山茶

咸淳臨安志東西馬塍山茶色品最盛

陳了齋有接花詩云花單可使十色黃可使紫今
觀馬塍栽接有一本而十色者

棲霞嶺桃花

咸淳臨安志棲霞嶺舊多桃花開時

爛然如霞故以名嶺其下爲桃溪

半道紅桃花

武林舊事北山關王廟舊路種桃號

半道紅

包山桃花

咸淳臨安志在城南有冷水峪多桃花

名桃花關門上舊有蒸霞二字西湖志類鈔冷水

峪夾山多桃花中有流水舊呼桃源遊人多集焉

胡仲參包山觀桃花詩因訪桃花到嶺根御林春色此平分千株未數栽唐觀一幅猶堪畫晉源仙

在雲間無處覓人行風外有香聞笙簫隱隱宮城隔立盡黃昏更斷冤黃順之冷泉峪桃花詩石家

步障久成塵移作包山一段春惆悵日斜原上路年年紅雨打行人

湖堤緋桃

西湖雜記望湖亭接斷橋一帶堤甚工

緻夾道種緋桃垂楊芙蓉山茶之屬二十餘種

周紫

芝聞西湖梅盡桃花已有開者作詩二首不到西湖忽換年今朝欲挂杖頭錢催成柳色遽如許落盡梅花最可憐日日湖邊踏淺沙西湖久住已成家劉郎去後空腸斷憶著元都觀裏花高應冕湖隄看桃花詩雨餘還出郭難負看花期烟外鳥啼樹風前魚弄絲舟移春水急花落暮山遲醉路迷芳草桃源聞馬嘶劉子伯雨後湖堤看桃花詩山雲忽卷湖西雨春色遙分兩岸花香溼馬蹄芳草亂鳥棲煙樹夕陽斜一枝照水含朝露幾樹臨風落暮霞多少遊人醉歌舞王孫何事隔天涯吳允嘉湖隄看桃花詩青油榜子木蘭橈夾岸桃花映水嬌愛殺多情雙蛺蝶飛來飛去段家橋

滿覺壠李花

萬曆杭州府志李花之多莫盛於西

山滿覺壠花時一望如雪名類有清消紫粉鵝黃

紅李等種類

李流芳西湖臥遊冊跋從煙霞寺山門下眺林壑窈窕非復人境李花時

尤奇絕真瓊林瑤島也快雪堂集余從十八澗出徐村一路李花盛開如雪

天竺桂

咸淳臨安志

木犀有黃紅白三色舊天竺

山多有之

蘇軾天竺山送桂花分贈元素詩月闕霜濃紅蕊乾此花原屬桂堂仙鷺峰子

落驚前夜蟾窟枝空記昔年破裊山僧憐耿介練
袞溪水鬪清妍願公採擷紉裳佩莫遣孤芳老澗
邊郭祥正香桂林詩根托山中地香分月裏秋遊
人莫攀折風散一巖幽張九成憶天竺桂詩湖上
北山天竺寺滿山桂子月中秋黃英六出非凡
種肯許天香過別州自注天竺種他州無本

滿覺壠桂

錢塘縣志

桂一名木犀滿覺壠獨盛拔

萃岑嶺敷條巖壑花時遊人雜沓其下

西溪桂

王穉登西溪寄彭欽之書

西溪十八里皆

行山雲竹靄中衣袂盡綠桂樹大者兩人圍之不
盡樹下花覆地如黃金山中人縛帚掃花售市上
每石僅當脫粟之半耳

靈山野桂

靈隱寺志靈山多野桂無種而生

靈隱桂子

南部新書杭州靈隱山多桂樹僧曰月

中桂也至今中秋夜往往子墜

靈隱寺志載堂禪師曾聞寺屋上歷

落有聲出視之其狀圓而長大如萁麻子殼有文
亦相類取奉具德和尚曰此月中桂子吾已見過
二次時有好事者索觀取四五枚去纔至揚州而
桂子已盡本草拾遺今江東諸處每至四五月晦
時多於衢路間得月桂子大於狸豆破之辛香古
老相傳是月中下也餘杭靈隱寺僧種得一株近

代詩人多所論述洞冥記云有遠飛雞朝往夕還常啣桂實歸於南土南土月路也故北方無之山桂猶堪為藥况月桂乎

天竺桂子

羣芳譜浙中山桂台州天竺最多子如

蓮實或二或三離離下垂天竺僧稱為月桂其花

時常不絕枝頭葉底依稀數點亦異種也

本草綱目月桂

落子之說起於武后時相傳有竺僧云自天竺鷲嶺飛來故八月常有桂子落於天竺道經月桂謂之不時花皮日休天竺寺八月十五日夜桂子詩玉顥珊珊下月輪殿前拾得露華新至今不會天中事應是嫦娥擲與人陸龜蒙和襲美詩霜實常聞秋半夜天台天桂墮雲岑如何兩地無人種却是湘灘是桂林釋慈永代懺主撰桂子詩并序上嗣統之六祀天聖紀號龍集丁卯秋七八兩月望

舒之夕寺殿堂左右天降靈實其繁如雨其大如
豆其圓如珠其色白者黃者黑文者時有帶殼者
殼味辛識者曰此月中桂子也州牧右諫議大夫
胡公則同太常博士秘閣校理陳公詰太常博士
孫公昱暨冠裳好事者皆封呈咸奇之舊俗所傳
月墜桂子惟天竺素有之唐天寶中寺前一子成
樹今月桂峰在焉刺史白公居易詩云宿因月桂
落醉爲海榴開注云天竺有月中桂子落靈隱多
海榴花又東城桂詩曰子墮本從天竺寺根盤今
在闔閭城又刺史盧公輔句云遠客偏求月桂子
老僧不誌石蓮華凡才士好以詩游勝槩者到茲
鮮不以月中桂子爲奇句焉子居是山興復廢寺
十有二載始此一見之耳因取之播種林下浹旬
而甲坼彌月而盈寸雖柔條未抽而綠葉可識信
東平庭際淮南小山固不可以同日而語明年春
移白猿峰下古回軒亭環亭而植凡二十有五株
仍改亭爲月桂亭作詩二章一章十二句一章八
句刻石是亭之側敢告後賢桂子詩云月桂生瑤

實千年會一時偏從天竺落祇恐月宮知出海光
輪滿當軒玉樹欹嬋娟含素影凌亂下空墀泉客
珠連泣秋荷露忽垂林
間僧共拾猶誦樂天詩

月輪山桂子

脞說張君房爲錢塘令宿月輪山寺

僧報曰桂子下墀遽登墀望之紛紛如烟霧回旋
成穗散墜如牽牛子黃白相間咀之無味

招賢寺紫陽花

南部新書招賢寺僧植桂香紫可

愛郡守白公號紫陽花

白居易紫陽花詩并序招賢寺有山花一樹無人知

名色紫氣香芳麗可愛頗類仙物因以紫陽花名
之何年植向仙壇上早晚移栽到梵家雖在人間
人不識與君
名作紫陽花

孤山榴花

咸淳臨安志唐時孤山有石榴花靈隱

舊亦多海石榴樂天詩宿因月桂落醉為海榴開

青箱雜記錢武肅王諱鏐至今吳越間謂石榴為

金櫻白居易題孤山寺石榴花示諸僧衆詩山榴

花似結紅巾容艷新妍占斷春色相故關行道地

香塵擬觸坐禪人瞿曇弟子君知否恐是天魔女

身化

龍井素蘭

錢塘縣志老龍井產素蘭品絕一郡

法華山蓀

羣芳譜蘭花紫白者名蓀出法華山

龍山瑞香

西湖遊覽志餘瑞香有黃紫二種有紫

瓣而緣金者

蘇軾次韻曹子方龍山真覺院瑞香花詩幽香結淺紫來自孤雲岑骨香

不自知色淺意殊深移栽青蓮宇遂冠薜蘿林
紉爲楚臣佩散落天女襟君持風霜節耳冷歌笑音
一逢蘭蕙質稍回鐵石心置酒要妍暖養花須晏
陰及此陰晴間恐致慳嗇霖彩雲知易散鸚鵡憂
先吟明朝便陳迹試着丹青臨又真覺院瑞香調
寄西江月詞公子眼花亂發老夫鼻觀先通領巾
飄下瑞香風驚醒謫仙春夢后土祠中玉蕊蓬萊
殿後靚紅此花清絕更纖濃把酒何人心動又坐
客見和復次韻詞小院朱闌幾曲重城畫鼓三通
更看微月轉光風歸去香雲入夢翠袖爭浮大白
皁羅半插斜紅燈花零落酒花濃好語一時飛動
又再用前韻戲曹子方坐客云瑞香爲紫丁香遂
以此曲辨證之怪此花枝怨泣託君詩句名通憑
將草木記吳風繼取相如雲夢點筆袖沾醉墨傍
花面有慙紅知君却是爲情濃怕見此花撩動

聚八仙花

說略

聚八仙即今八仙花西湖山中在

在有之

菩提寺杜鵑

咸淳臨安志 錢塘門外菩提寺有此

花甚盛東坡有南漪堂杜鵑花詩今堂基存此花

所在山多有之

蘇軾南漪堂杜鵑花詩南漪杜鵑
天下無披香殿上紅氍毹鶴林兵

火真一夢不歸

閨苑歸西湖

俞祠木香

西湖遊覽志孤山俞公祠內左有木香

一本引蔓雙栢高三丈餘枝條蒙密洒落滿庭花

時如迸玉垂珠雪色照耀輒香襲人聞數百步衆

鳥鳴噪其上終日不去至花殘乃不復聞

靈隱紅辛夷

槎菴小乘辛夷花鮮紅似杜鵑俗稱

紅白簫是也白樂天有靈隱寺紅辛夷戲酬光上人詩云紫粉筆含尖火燄紅胭脂染小蓮花芳情鄉思知多少惱得山僧悔出家

天竺石巖

花木考與杜鵑花本一種石巖先敷葉

後着花其色丹

趙抃上天竺寺石巖花詩對植齊開古梵宮欲求精筆畫難工直將

春占三旬盛誰謂花無十日紅未羨山桃資客笑且陪庭栢作家風遍尋他處都無此寶殿前頭只

兩叢

開元寺牡丹

西湖遊覽志餘白樂天爲杭州刺史

令訪牡丹獨開元寺僧惠澄近自京師得之植於
庭時春景方深惠澄設油幕覆其上徐凝自富春
來未識樂天先題詩曰此花南地知難種慚愧僧
閒用意栽海鷲解憐頻睥睨遊蜂未識更徘徊虛
生芍藥徒勞妬羞殺玫瑰不敢開唯有數苞紅萼
在含芳只待舍人來樂天到寺看花乃命凝同醉
而歸

四照亭牡丹 孤山四照亭之前疊石爲臺植牡丹
數百本悉彭城佳種花開如蒸霞爛錦遠近皆見

范浦芍藥

咸淳臨安志今艮山門外范浦多植此

花冠於諸色者有早緋玉白綴露等名又有千葉
白者土人尤貴之

靈鷲醯醢

山家清供一日過靈鷲訪僧蘋洲留午

粥甚香詢之乃醯醢花也

荷花

夢梁錄荷花紅白色千葉者西湖荷蕩邊風

送荷香馥然咸淳臨安志白公郡齋詩云遶郭荷

花三十里指西湖而言也錢塘縣志芙蕖西湖多

種之金房綠葉素株翠柯縈藻朱儀映川逸目王

穉登客越志湖中舊植藕花雲錦燦爛香氣十里

近惡其妨漁一時拔去刻石城闐著爲令雖釣徒

快心而湖色殊寂寂無可觀余意不若散水衡錢

於種花之家而留花娛人庶幾兩利

周紫芝湖上晚歸見荷花

二絕藕湖煙水欲沉沙已着芙蓉一兩花擬借短

蓑隨雨去共誰同把釣魚車穆穆煙柳誰家樹拍

拍西湖盡日風和靖宅邊山雨急蘇公堤上藕花

紅于石觀西湖荷花詩我昔扁舟泛湖去回望荷

花浩無數誰家畫舫倚紅妝笑聲迴入花深處笙

歌悽咽水雲寒花色似嫌脂粉浣夜深人靜月明

中方識荷花有真趣水天倒浸碧琉璃淨質芳姿

淡相顧亭亭翠蓋擁羣仙輕風微顫凌波步酒暈

潮紅淺渥唇膚如凝脂腰束素一捻香骨薄裁冰

半破芳心嬌泣露湖光花氣滿衣襟月落波寒浸

香霧快然人在藥珠宮便欲移家臨水住回首落
日低黃塵十年不到湖山路花開花落幾秋風湖
上青山自如故高啟西湖夏夜觀荷詩雨晴南浦
錦雲稠晚待湖平蕩槳遊狂客興多惟載酒小娃
歌遠不驚鷗半湖月色偏宜夜十里荷香已欲秋
爲愛前汀好涼景滿身風露未回舟孫一元晚坐
湖上荷花盛開詩薄晚西湖上花開還自憐風回
香冉冉鷗泛葉田田雲色晴移水月明淨放船夜
涼興更好獨坐釣絲邊袁中道西湖看荷花寄客
詩十里清流洗客塵銷魂芳艷滿湖濱秋來亦自
堪行樂只恐荷花不待人王瀛湖中觀蓮詩閒來
湖上放扁舟爲愛芙蓉花正稠十里彩雲明霽景
一番香雨洗清秋路從麴院追遺迹家在耶溪憶
舊遊懶向迴塘聽野唱恐教牽動百年愁朱應鍾
西湖采蓮曲五月芙蓉浦花開勝若耶若將湖作
鏡應照妾如花玉腕搖輕楫紅蓮暗綠波花深欲
無路棹轉忽聞歌尹臺西湖采蓮曲湖上羅裙映
玉缸蘇隄楊柳拂船窗采蓮誤觸鴛鴦起飛向花

間還自雙二八吳娃學戲船冰綃輕袿動如烟含
情棹入荷花裏笑問橫塘若個邊田藝衡西湖采
蓮曲湖面團團寶鏡開兩峰高髻聳妝臺阿郎不
用頻看妾自有荷花照水來風翻桂楫浪如雨鴛
鴦雙飛翠蓋舞郎嗅芙蓉誇味甜誰知寸心獨自
苦范成大雨後遊西湖荷花盛開調寄滿江紅詞
柳外輕雷催幾陣雨絲風急雷雨過半川荷氣粉
融香浥弄蘂攀條春一笑從教水濺羅衣溼打涼
州簫鼓浪花中跳魚立山倒影雲千疊橫浩蕩舟
如葉有採菱清些桃根雙楫忘却天涯漂泊地尊
前不放閒愁入任碧筩十丈卷金波長鯨吸陳三
聘次石湖韻詞紺縠浮空山擁髻晚來風急吹驟
雨藕花千柄艷粧新浥窺鏡粉光猶有淚菱波羅
襪何曾溼訝漢宮朝罷玉皇歸凝情立尊前恨歌
三疊身外事輕如葉悵當年空擊誓江孤楫雲色
遠連平野盡夕陽偏傍疎林入看月明冷浸碧琉
璃君須吸朱彝尊西湖荷花調寄滿江紅詞郭外
垂楊直映到水仙祠屋愛十里花明鏡面岸沉沙

腹幾陣涼颼翻葉白連盤驟雨跳珠綠是誰儂一道撥青蘋波紋蹙紅衣褪開還續碧筒卷擎相促繞菱根荇帶冷香飛逐偏是風前蝴蝶住但無人處鴛鴦浴擘生綃悔不學丹青描橫幅

雙蓮

雙蓮即瑞蓮宋時產於北山今湖上亦多見

之

蘇軾沈諫議招遊湖不赴明日得雙蓮於北山下詩二首湖上棠陰手自栽問公更得幾回來

水仙亦恐公歸去故遣雙蓮一夜開詔書行捧綬金箋樂府應歌相府蓮莫忘今年花發處西湖西

畔北
山前

繡蓮

咸淳臨安志聚景園後湖中者名繡蓮極貴

西湖遊覽志餘繡蓮紅瓣而黃緣結實如飴

金蓮

靈隱寺志生湖中重臺萬曆杭州府志名曰

地湧金蓮

韜光金蓮

名花譜西湖北山韜光菴有金蓮圓葉

小花浮生水面

顯教寺金蓮

西溪梵隱志顯教寺殿前爲金蓮池

其花色黃如金葉圓如小錢

瑞相院青蓮

咸淳臨安志西蓮瑞相院產青蓮花

茉莉

武林舊事六月士女登舟泛湖爲避暑之遊

茉莉爲最盛初出之時其價甚穹婦人簇帶多至

七插

花有北山之樞子

花有北山金燈

西湖藏春塢門前有二古松

各有凌霄花絡其上詩僧清順常晝臥其下子瞻

為郡一日屏騎從過之松風騷然順指落花覓句

蘇軾凌霄花調寄減字木蘭

雨裏疎影微香下有幽人晝夢長湖風清軟雙鵲飛來爭噪晚翠飈紅輕時下凌霄百尺英

百花藏譜生杭之西山三月開花細小而繁

香馥甚遠即俗名七里香也種之易活

金鉢盂

靈隱寺舊志生湖中單瓣

白蘋

靈隱寺舊志生湖中色白香清即萍藻所生

紅蓼

靈隱寺舊志生湖濱俗呼水紅

蘇堤芙蓉

咸淳臨安志東坡倅杭日有和述古中

和堂木芙蓉詩今蘇堤及岸湖多種秋日如霞錦

陳造四月望再遊西湖詩春光陸續委東流看到湖邊安石榴更與蘇堤鷗鷺約辦舟來賞牡丹秋自注俗目芙蓉爲秋牡丹湯煥六橋芙蓉詩柳疎荷晚湖波涼木芙蓉發延秋光澹烟斜日弄清影浴鳬飛鷺窺紅妝繁華喚醒鶯燕老歌舞夢斷蒹葭蒼何當擷取問漁父著我一葉楓林傍高觀國蘇堤芙蓉調寄菩薩蠻詞紅雲半壓秋波碧豔妝泛露嬌啼色佳夢入仙城風流石曼卿宮袍呼醉

醒休捲西風錦明日粉香殘六橋烟水寒陳逢辰
延祥觀拒霜調寄西江月詞綠綺紫絲步障紅鸞
彩鳳仙城誰將三十六陂春換得兩堤秋錦眼纈
醉迷朱碧筆花俊賞丹青斜陽展盡趙昌屏羞殺
舞鸞妝鏡張翥秋日湖上賞木芙蓉調寄南鄉子
詞秋色照波明夾岸芙蓉似錦城罨畫樓臺紅粉
面輕盈未許黃徐寫得成一舸載楊瓊共醉花前
玉笛聲猶記青鸞和月跨三生我是仙家石曼卿

城垣甘菊

產城堞上花小而色黃味甚香美今每

歲採備入貢

馬塍鞠

沈競菊譜臨安西馬塍園子每歲至重陽

謂之鬪花有八十餘種錢塘縣志西湖多市其種

黃者九十有三白者八十有二紫者三十粉紅者

二十有四稱異品者十有七近日土人或以菴蘭

接菊花之小者頓大又以各菊互接則白間黃黃

間紅尤參錯可愛

楊萬里經和寧門外賣花市見菊詩病眼仇觀一束書客舍葭

葭菊一株看來看去兩相厭花意索寞却似無清曉肩輿過花市陶家全圖移在此千株萬株都不看一枝兩枝誰復貴平地拔起金浮屠瑞光千尺照虛碧乃是結成菊花塢蜜蜂作僧僧作蝶菊花障子更玲瓏生採翡翠鋪屏風金錢裝面蜜如積金鈿滿地無人拾先生一見雙眼開故山三徑何獨懷君不見內前四時有花賣和寧門外花如海

觀音菊

百菊集譜天竺花是也

此非南天竺或呼為落帚花亦非也

自五月開至九月花頭細小其色純紫枝葉如嫩

柳其榦之長與人等或呼爲觀音菊

史鑄觀音菊詩霞幢森列

引薰風高出疎籬紫滿叢翠葉纖纖如細柳直宜插向淨瓶中

果品

樟亭櫻桃

咸淳臨安志唐時樟亭驛有雙櫻桃居

易樟亭雙櫻樹詩南館西軒兩樹櫻春條長足夏陰成素華朱實今雖盡碧葉風來別有情

七寶山櫻桃

西湖遊覽志七寶山舊有櫻桃園宋

時採含桃以獻太廟者

靈隱寺枇杷

靈隱寺志大殿下有枇杷樹花實異

他所咸淳臨安志白者爲上黃者次之無核者名

椒子枇杷

湖菱

咸淳臨安志

初生嫩者名沙角硬者名餽飽

湖中生如栗樣者極鮮東坡望湖樓醉書五絕詩

云烏菱白芡不論錢

蘇軾申三省起請開湖六條狀西湖水淺芡葑壯猛雖盡

力開撩而人力不繼則隨手葑合與不開同竊見吳人種菱每歲之春芡除撈漉寸草不遺然後下種若將葑田變為菱蕩永無芡草堙塞之患宋史蘇軾傳軾知杭州時募民種菱湖中葑不復生收其利以備修湖

湖芡

咸淳臨安志

芡又名雞壅產西湖者尤勝然

不多也可篩為粉萬曆錢塘縣志芡實湖產特佳

香輒而粒大於越新編芡大如拳有刺中圓實可

啖俗謂雞頭今出杭州西湖越絕無

周紫芝食芡有感詩雞頭

子熟得新嘗流落空嗟客異鄉紅線綠荷香裏夢十年燈火記錢塘

湖藕

西湖遊覽志藕出西湖者甘脆爽口匾眼者

尤佳其花有紅白二種白者香而結藕紅者艷而

結蓮瞿宗吉詩云畫閣東頭納晚涼紅蓮不及白

蓮香是也錢塘縣志藕出西湖者曰花下藕尤美

蓮房

萬曆杭州府志

紅花者爲上白花者次之然

尤以江干鴻鴈池及西湖所產爲最餘皆不及

石塢楊梅

咸淳臨安志舊載楊梅石塢其地產楊

梅今在煙霞嶺瑞峰寺之側

施註蘇詩杭州圖經楊梅塢在山南近瑞

峰楊梅尤甚有紅白二種今杭人呼白者為聖僧梅西湖古蹟事實杭州楊梅塢內有一老嫗姓金其家楊梅甚盛所謂金婆楊梅是也蘇軾參寥惠楊梅詩新居未換一根椽只有楊梅不值錢莫共金家鬪甘苦參寥不是老婆禪

梵天寺楊梅

蘇軾詩夢繞湖山却月廊白梅盧橘

覺猶香自注杭州梵天寺有月廊數百間寺中多

白楊梅盧橘

兩山楊梅

萬曆杭州府志有早色晚色燠色嘽色

數種早色色最紅味酸燠色色紫黑味甘美嚙色

晚色俱紅紫半晚色味鬆甜北山多早南山多晚

燠色並有之可燠可晒可水可糖可蜜

周紫芝西湖摘楊梅

調寄阮郎歸詞西湖山下水潺潺滿山風雨寒枝頭紅日曉爛斑越梅催染丹連翠葉擁金盤玉池生乳泉此生三度試甘酸欲歸歸尚難

十八礶楊梅

萬曆杭州府志楊梅東墓嶺十八礶

亦盛俗呼楊梅礶

徐村楊梅

萬曆杭州府志徐村產多尤甘美

龍井楊梅

錢塘縣志龍井法華山產者爲天下冠

橘 橙

元淮蘇隄秋宴詩湖上秋來景色新芙蓉

綠橘間黃橙

大樹堂栗

靈隱寺志慧理祖師西天攜來種實小

而味美惟靈隱有數十本移他處則不生大樹堂
一株最大乃慧理手植東晉時物也至今鬱茂

報國寺銀杏

成化杭州府志報國寺有銀杏樹其

實無心槎菴小乘銀杏俗名白果一名鴨腳子武

林山甚多此樹不華而實或云夜半一花即斂楊
載錢塘懷古詩所謂萬年珠樹落秋霜蓋指此樹

也

蔬品

菌

咸淳臨安志多生山谷竹松間其大者淨白名玉蕈最貴黑者名茅菌赤者名竹荪皆下品

松花菌

獐園西湖諸山中有松花菌色紅潔可愛

俗名胭脂蕈

竹蕈

上天竺山志生竹根上色白而甘無毒

靈山椒

靈隱寺舊志靈山舊產椒與川蜀無異今

無

靈隱寺志椒園種椒香勝他處

蘿蔔

成化杭州府志蘿蔔大而長者尺餘出錢塘

方家峪等山咸淳臨安志一名蘆菹西溪為勝

茨菇

靈隱寺志湖中出

莊同生西湖竹枝詞勸郎休戀鳳凰山須記茨菇淺

水灣手劈竹田森碧玉莫教紅淚灑成斑

茭白

萬曆錢塘縣志茭白本秋實惟西湖四時有

之茭田之直可十餘金利倍禾稼

錢惟善食茭白詩西風吹雨飽

秋菰卸却青衣見玉膚客裏嘗新成一笑不圖今日見西湖

湖蓴

萬曆錢塘縣志生西湖中春末夏初采有冰

鈴附葉下舊傳產湘湖不知湘湖人來此取去錢

塘縣志初生嫩而無葉名雉尾蓴又名馬蹄蓴葉

舒長名絲蓴至秋則無人采矣西湖遊覽志餘聞

之漁人云西湖第三橋近出蓴菜不下湘湖

閱耕餘錄

蓴菜生松江華亭谷郡志載之甚詳吾家步兵所爲寄思於秋風者也然武林西湖亦有之袁中郎狀其味之美云香粹滑柔畧如魚髓蟹脂而輕清遠勝其品無得當者惟花中之蘭蓴之楊梅可以作配余謂花中之蘭是矣蓴中楊梅豈堪敵蓴何不以荔枝易之李流芳西湖卧遊冊三潭采蓴跋辛亥四月在西湖值蓴菜方盛時時采擷作羹飽啖有蓴菜歌大意謂西湖蓴菜自吾友數人而外無能知其味者袁石公盛稱湘湖蓴美不知湘湖無蓴皆從西湖采去又謂蓴非湘湖水浸不佳不知蓴初摘時必經宿浸乃愈肥凡泉水湖水皆可不必湘湖也然西湖蓴人竟無知之者圖中人舟

縱橫皆蕭山賣菜翁也可與吾歌並存以發好事者一笑李流芳蓴羹歌怪吾生長居江東不識江東蓴菜美今年四月來西湖西湖蓴生滿湖水朝朝暮暮來采蓴西湖城中無一人西湖蓴菜蕭山賣千擔萬擔湘湖濱吾友數人偏好事時呼輕舠致此味柔花嫩葉出水新小摘輕淹雜生氣微施薑桂猶清真未下鹽豉已高貴吾家平頭解烹煮間出新意殊可喜一朝能作千里羹頓使吾徒搖食指琉璃盃成碧玉光五味紛錯生馨香出盤四座已嘆息舉筯不敢爭先嘗淺斟細嚼意未足指點杯盤戀餘馥但知脆滑利齒牙不覺清虛累口腹血肉腥臊草木枯此味超然離品目京師黃芽軟似酥家園燕筍白於玉差堪與汝為執友菁根杞苗皆臣僕君不見區區芋魁亦遭遇西湖蓴生人不顧季鷹之後有吾徒此物千年免沈錮君為我飲我作歌得此十斗不足多世人耳食不貴近更須遠挹湘湖波張鳴鶴西湖採蓴詩渚蓴香細綠生春翠帶牽絲出水新漫憶秋風歸興早喜逢

令節薦羞頻自憐，藿食醯鹽味詎羨。豪門鼎俎陳
采擷不妨歸棹晚，桃花煙暖隔魚津。凌邱西湖採
萼詩，花滿蘇堤柳滿烟。採萼時值艷陽天，漫移短
棹尋漁隱。似逐佳人拾翠鈿，香蘊和羹舒雉尾。脂
凝細葉煮龍涎，浮山寄寓湖山隱。不向秋風怨未
還，徐桂西湖采萼曲。乍嚼冰絲還冷齒，更食玉液
會流涎。桃花飄盡楊花落，留得湖中景物鮮。虞淳
貞西湖采萼曲，湖上風光兩處分。采萼弄影自爲
羣，龍鬚冷滑龍膏紫。寒色侵衣染綠雲，沈明臣西
湖采萼曲。西湖萼菜勝東吳，三月春波綠滿湖。新
樣越羅裁窄袖，着來人說似羅敷。江鑠西湖采萼
曲，雨過桃花漲滿湖。雉萼風格最於酥，絲縈漢女
蒼霞佩。玉映鮫宮雪泪珠，張文穎西湖采萼曲。碧
蔭隨波疑似玉瓊枝，映水滑於酥不妨采作真人
供。一夜春風遍兩湖，張遂辰采萼曲。湖南三月潭
水綠，邇年競歌采萼曲。小舸單漿入曉煙，葉葉絲
絲袂連屬。浮波乍見色參差，柔露盈盈不滿掬。更
憐寒沁滑流匙，粉乳芳蕤敢輕觸。一從此品出人

間紫萼青菰盡臣僕清泉淡煮味有無肯使尋常
薑桂辱因來逐嗜諸少年遂鄙長筵膾如玉偶傳
勝事真可人安排未免嗟聊復雖高鹽豉說風流
詎忍清饒作題目我欲一笑賦老饕莫祇相矜窘
邊幅不道當時生彘
肩覆啗麓豪元不俗

藥品

黃皮木

咸淳臨安志錢塘雷峰塢有之

名勝志雷峰塢產黃

皮木

貫衆

咸淳臨安志生龍井口

茯苓

武林舊事小麥嶺無垢寺偃松下有茯苓因

名泉爲茯苓泉

益母草

咸淳臨安志生龍井山谷亦名草天麻

石膏

太平寰宇記錢塘縣治亥地有石膏雨霽時

出藥用爲最

本草綱目錢塘山中雨後時自出今錢塘人鑿山取之甚多搗作齒藥貨

用浙人呼爲寒水石入藥最勝他處者咸淳臨安志軟者寒水石硬者石膏生南高峰塢山下

草品

金星草

咸淳臨安志生南高峰

芝

花史

臨安許邁常採芝於西山武林舊事靈芝

寺錢王故苑以芝生其間捨以爲寺故名山居新

語余山居寶雲山上不時生芝上天竺山志有紫

紅黃三種皆木本七識云柄如漆者是暑雨時採
蒸熟數年不變

青芝

西湖遊覽志青芝塢嘗產青芝

葑

蘇軾乞開西湖狀西湖水涸草生漸成葑田熙

寧中臣通判本州則湖之葑合蓋十二三耳今十
六七年之間遂堙塞其半父老皆言十年以來水

淺葑橫如雲翳空倏忽便滿更二十年則無西湖

矣

蘇軾次韻林子中見寄詩卷却西湖千頃葑笑
看魚尾更葑葑施宿注公開西湖以葑積爲堤

以通南北今
蘇公堤是也

西溪志
卷二
三
蘊藻蘋荇

西湖遊覽志餘湖中蘊藻蘋荇諸水草

牽風演漾彌蔓不絕土人取之以供魚食歲計亦

不下數百金也

周紫芝次韻關子東湖上雜書水荇詩舊聞春草滿池塘何事新題

荇藥黃寄語藕花從此去不須滿意着紅粧

蘆葦

周紫芝湖上種蘆詩小序湖亭之勝大似江

上但無蘆葦二月二十移植數千本

周紫芝種蘆詩大年着色

山前雨摩詰無聲句裏秋已是湖山無限好更栽蘆葦伴輕鷗

河水蘆花

西溪百咏序蒹葭里俗名河水一派沙

汀水瀨蘆花如雪

浪頭蘆

王考功集浪頭溫湖中草名俗云此草多

則湖水大

王士祿西湖竹枝詞兒家住近傍湖邨歲歲門前驗水痕莫怪今年湖水闊春

來長遍

浪頭蘆

竹品

皇竹 五雲山雲栖寺夾道多竹寺內有大竹一竿

國朝康熙四十六年

聖祖仁皇帝南巡幸寺

賜名曰皇竹

雙竹

竹譜條篁嫩篠對抽並引王子敬謂之扶竹

武林山西雙竹院中產靈隱寺志天親竹即雙竹

也

趙抃題杭州雙竹寺詩粉籜雙雙脫修篁兩兩高同心齊管鮑並節漢蕭曹寒歲霜威禦炎天暑氣逃此君真可異吟遠不知勞

方竹

格古要論方竹出西蜀浙江杭州西湖飛來

峰山下亦有之

木竹

釋贊寧筍譜今靈隱山出筍堅可食今人採

竹作杖可愛或與籜同類耳

新婦竹

事物紺珠出武林山陰釋贊寧筍譜其竹

圓直靱可爲筏筍則三月而生可食

鶴膝竹

咸淳臨安志出靈隱山節密而內實略如

天壇藤間有突起者故名靈隱寺志竹出靈山一

名唐公竹又名鶴膝竹曲突如鶴膝狀

石面竹

靈隱寺志鷲山多有之

石竹

咸淳臨安志林和靖有石竹二叢詩云深枝

苒苒裝溪翠碎片英英剪海霞

金竹

西溪梵隱志金竹嶺滿山之竹皆作黃金綠

玉之色

剛竹

釋真一筍譜可以爲筐籃法華土民之貧者

乃用之以度生

壽星院竹

東坡志林湖上壽星院竹極偉

風篁嶺竹

西湖志類鈔風篁嶺蒼筤篠簜風韻淒

清至此林壑深沉迴出塵表嶺故叢薄荒密元豐
中僧辨才淬治潔楚名曰風篁

冬筍

萬曆杭州府志

冬筍俗名潭筍味更美杭州

筍四時皆有其美甲於諸蔬

早筍

咸淳臨安志

哺雞筍出稍早和靖詩煙崖早

筍肥

晚筍

咸淳臨安志出楊墳

扶竹筍

釋贊寧筍譜扶竹今武林山西舊謂雙竹

院中所產相傳云自永泰以來有之馮翊嚴諸爲
之記王子敬竹譜云會稽箭竹錢塘扶竹蓋此雙
竹即扶竹也是竹爲筍便有合歡貌

紫桂筍

釋贊寧筍譜或問筍有五色章采否對曰

江東黃筍閒居賦有青筍閑中賦有素筍赤筍錢
塘多紫桂筍自餘斑狸縹緗不可勝言

鷺筍

釋贊寧筍譜錢塘多生其色紫苞當鷺至時

生故俗謂鷺筍

法華山筍

錢塘縣志法華山筍最盛有烏哺雞白

哺雞之名釋真一筍譜江南吳越皆多筍然未有

過於武林法華山其品爲最高也

猪蹄紅

釋真一筍譜冬月即生理頭土中以鋤掘

之可三寸許其味極鮮甲於他筍未出土名猪蹄
紅長尺許其籜元又名元筍又名蚤筍蓋冠諸筍
而先出者

鮮芽

釋真一筍譜係晚筍在三月間盛時生其籜

間光潤而紫元狀類鰻魚不假鋤壅卑溼之處愈生

鷺鷥青

釋真一筍譜三月間生諸筍皆清瘦是筍更瘦而色稍青其味清新而有澹趣

尖頭青

釋真一筍譜最晚出諸筍寥落此筍方翠

筍無有不尖此筍更尖如削其味鮮

毛筍

咸淳臨安志一名猫頭大者一莖重數斤釋

真一筍譜爲諸筍之王其籜有毛故名俗呼爲貓筍者非也大者重幾二十餘斤猶未出土肉白如

霜墮地即粉碎以指掐之其軟嫩如腐嗅之作蘭花香

邊筍

夢梁錄筍有數名有邊筍釋真一筍譜即毛筍之旁出者方筍盛時生氣上升筍皆豎生氣既衰根即橫生盡其力可橫亘十餘丈至地之邊際與竹之長短相稱謂之竹邊故名邊筍又其狀類鞭亦名鞭筍地肥者軟嫩長尺許其籜紫色而兼白其味恬淡而鮮其氣醇而有蘊藉不類毛筍之精英盡發洩於外也

雷山筍紅筍

釋真一筍譜雷山筍紅筍皆於春時

鬪妍春至則彙生春去則絕響

苦筍

山家清供竹有苦竹出筍味亦苦釋真一筍

譜法華舊無苦筍余倡植之就其竹爲籬間亦取
筍食之煮苦筍與煮苦菜同法投之沸湯以武火
煮少頃取起以清水入磁缸漂之頻換水半日可
食不用鹽浸以刀切寸段啗之初入口尚有微苦
後苦氣漸轉覺舌本清涼爲恬淡爲無味之味非
俗士所可知也

剛竹筍

釋真一筍譜剛竹筍其味冽而苦與南都

之筍筍同

羽屬

鶴

高士傳林逋結廬西湖之孤山嘗蓄二鶴或汎

小艇出游客至則童子開籠縱鶴逋隨放棹而歸

鴉

四朝聞見錄紹興初高宗建行闕於鳳凰山山

中林木蓊如鴉以千萬高宗在汴邸無山未嘗聞

此至則大駭命內臣張去爲領修內司諸兒聚彈

射而驅之臨平赤岸間蓋去闕有五六十里未幾

鴉復如初宮中亦習以為常

百舌

咸淳臨安志

和靖詩百種堪憐巧言語一般

惟欠好毛衣

杜鵑

杭州府志

即杜宇一名子規田家候其鳴則

興農事

周文璞壽星寺聞子規詩二首子規欲歸歸未得啼向錢王壽星石月明血盡人不

知只怪曉山深似碧莫向空山惱病僧暮雲臺殿異鄉人多時不識巴山路守着濃花啼過春周紫芝次韻關子東湖上雜書子規詩兩邊山木子規啼不管還鄉客夢稀應為老翁推不去故將好語勸人歸李濤三月十六日西湖聞杜鵑詩纔上蘇堤聞杜鵑杜鵑怪我在天邊平生不作功名想今日胡為富貴牽辟穀未能那廢日買山所欲尚無錢但須兩事略如意便占白雲深處眠吳錫疇湖

上聞鵲詩湧金門外買湖船綠樹陰陰叫
杜鵑恰莫叫從城裏去有誰人肯賦歸田

提壺

咸淳臨安志

和靖過下湖別墅詩多謝提壺

鳥留人到落暉

鷓鴣

萬曆杭州府志

鷓鴣其鳴曰鉤輅林逋詩所

謂雲木叫鉤輅

鷓鴣

咸淳臨安志

和靖春日即事詩鴛鴦如綺杜

蘅肥鷓鴣夷猶翠歛微

松鼠竹雞

林逋湖山小隱詩晝巖松鼠靜春塹竹

雞深

獸屬

馬

夢梁錄吳越王牧馬於錢塘門外東西馬塍其

馬蕃息號為馬海

鹿

和靖集注所養鹿名呦呦

林逋呦呦詩深林槭槭分行響淺葑茸茸

疊浪痕春雪滿山人起晚數聲低叫喚籬門

猿

李紳詩序杭州天竺靈隱二寺寺多猿猴謂之

孫團彌長其類釋遵式白猿峰詩序西天僧慧理

蓄白猿於靈隱寺陸羽記

徐集孫下竺看猿詩渴泉飲罷過別枝株守山

林得便宜伸手攫拏野僧果貴游玩弄如兒嬉膏梁恣欲甚邱壑苞苴賸把實囊橐本然無物拋乞

與縱有腥羶醫無藥勸汝儔侶只依僧殘齋賸核
亦潔澄切勿自照具人面便爾忘却當初洞口呼
不應張昱冷泉亭觀猿詩舊從巫峽看猿挂此日
山中復見之點與樵蘇爭墮果捷於風雨下高枝
月沉夜澗魂先斷風攬霜空叫轉悲應記往年梅
嶺事玉環付與老僧知黃玠冷泉亭呼猿詩俯石
瞰寒泉飲之不盈升照影忽自笑相看面如冰搖
搖松樹枝山猿呼欲應漸老筋骨疲愛爾解飛騰

蟲屬

蝙蝠

咸淳臨安志蝙蝠洞多蝙蝠因以名之西湖

遊覽志蝙蝠洞內產蝙蝠大者如鴉亦有純白者

其糞即夜明沙

蜥蜴

靈隱寺志北高峰澗中有蜥蜴長二寸黑色

腹有紅點四足五爪

蟋蟀

宋史賈似道傳似道不事朝政於半閑堂日

據地鬪蟋蟀

敏求記似道撰促織經一卷促織經其名色有白牙青拖肚黃紅頭紫狗

蠅黃錦簑衣肉鋤頭金束帶齊臂翅梅花翅琵琶翅青金翅紫金翅烏頭金翅油帟燈三段錦紅鈴月額頭香色脂鈴之類甚多蟲之色白不如黑黑不如赤赤不如青其形以頭項肥腿腳長身背闊者爲上頭尖項緊腳瘦腿蕩者爲下蟲病有四一仰頭二捲鬚三練牙四踢腿若犯其一皆不可用

鱗屬

金魚

夢梁錄金魚有銀白玳瑁等色錢塘門外多

蓄養之入城貨賣名魚兒活

西湖遊覽志餘吳山大井中有金魚數十

頭父老云已一二百年自來無施食者兼以寒泉
陰竇仰蔽天日而至久不斃殆神物也宣德間大
旱井涸人有取食者肉堅韌若麻筋然鄴侯井中
亦有五色魚其源通西湖故孳乳日夥又與吳山
井不同也

玉泉魚

武林舊事玉泉泉色清澈蓄大金色魚西

湖遊覽志玉泉淨空院有池畝許清澈可鑑蓄五

色魚數十頭游泳如畫

徐集孫玉泉觀金魚詩石沼鑿瓊瑤金鱗數百條年

深須變化泉潔自逍遙網罟難垂手公卿擬上腰
龍宮依梵法翻水雨青霄朱彝尊杭州玉泉寺池
中五色魚凡千頭內一種翠藍者最可愛賦之調
寄玉人歌詞輕連白愛一種嫩隅葦藍拖碧練塘
風暖蒼玉恣拋擲丹砂泉淺游朱鬣受盡人憐惜
又爭如雨過天青者般顏色濠上未歸客投香飯

青精日斜與食蓮葉東西何事便深匿翠鱗六
六空搖尾嬾遞閒消息但年年映取柳陰千尺

南屏金鯽

冷齋夜話東坡詩我識南屏金鯽魚西

湖南屏山興教寺池有鯽十餘尾金色道人齋餘

爭倚檻投餅餌為戲

東坡志林舊讀子美六和寺詩云沿橋待金鯽竟日獨遲

留初不喻此語及俸錢塘乃知寺後池中有此魚
如金色昨日復遊池上投餅餌久之乃略出不食
復入不可復見自子美作詩至今四十餘年已有
遲留之語則此魚自珍貴蓋久矣苟非難進易退
而不妄食安得如此壽耶程史今中都有秦魚者
能變魚以金色鯽為上鯉次之貴游多鑿石為池
寘之簷牖以供玩問其術秘不肯言或云以闌市
洿渠水之小紅蟲飼凡魚百日皆然初白如銀次
漸黃久則金矣未暇驗其信否也又別有雪質而
黑章的樂若漆曰玳瑁魚文采尤可觀惟杭人能

餌蓄之

湖鯽

萬曆杭州府志鯽池河江海亦皆有之然以

湖生者爲美若出西湖之裏湖者更佳咸淳臨安志西湖產者骨軟肉鬆

湖魚

萬曆杭州府志湖魚爲鯽爲鱮即鯪之屬然

湖生者不甚大而美爲肉鯪爲鱮篋西湖遊覽志餘湖中多雜魚而獨無鯪蓋地氣絕產者宋諺云

南柴北米東菜西水今改西魚者蓋城中之水不

藉西湖而魚產之富歲歲不減也

張文宿西湖打魚歌湖中雨深

水滿隄錦鯉潑潑銀鯽肥老漁爭捕識水性隨波
撒網船如飛儂家有船亦有網身拙不慣腳爲槳
眼見他人得甚多日暮歸來但空掌鄰姬送酒新
落槽老妻捲袖操霜刀豈知簾內無一得清燈夜
共何寥寥朝來水長船競出緩咎簸錢益繁密魴
鮎未寸亦不遺我縱得之何忍食廚中老妻且莫
嗟湖水一退唯蒹葭魚兮魚
兮善自育老漁之心無饜足

魚羹

武林舊事淳熙間壽皇以天下養每奉德壽

三殿遊幸湖山小舟時有宣喚賜予如宋五嫂魚

羹嘗經御賞

江鮓

咸淳臨安志六和埕江邊生者極鮮腴

湖鰻

萬曆杭州府志鰻魚湖中有之然不如江生

之多每秋風大作其至如陣市者滿道但其味則以湖中者為佳錢塘縣志善市者取之於江蓄之於湖則脊黑而肥美

土步

靈隱寺志似河豚而小其味甚美產於西湖

萬曆杭州府志土鯪俗名吐哺以清明前者為佳

邵斯貞西湖竹枝詞未到清明土鯪肥寺前新釀白薔薇沽得酒來魚正熟月到湖心蕩槳歸謹按土步魚演繁露作土部又作土附云此魚質沉常附土而行不似常魚浮水遊逝後人加魚去部則以為鯪耳其以土步為鯪魚恐未是也

介屬

湖鰕

咸淳臨安志鰕湖生者殼青

湖蟹

咸淳臨安志西湖舊多葑田產蟹土人呼湖

蟹和靖詩草泥行郭索又西湖晚歸詩云水痕秋

落蟹螯肥萬曆錢塘縣志生湖中者色青雄曰狼

螳雌曰博帶蟹略西湖蟹稱天下第一陸放翁詩

久厭羶葷愁下筯眼前湖上得雙螯

宋史沈邁傳邁知杭州閤

巷長短纖悉必知禁西湖魚鼈故人居湖上蟹夜

入其籬間適有客會宿相與食之旦詣府邁迎語

曰昨夜食蟹美乎客笑而謝之

汪元量杭州雜和

林石田詩偶出西湖上新蒲綠未齊攜來編縮項

買得蟹

無尾螺

淨慈寺志瀕湖居民將食螺已斷其尾濟

顛乞以放之遂活今西溪安樂山池中尚有無尾螺傳為濟顛手放故物也

貨屬

湖醞

清波雜誌醞法言人人殊故色香味亦不等

溫厚清勁復繫人之嗜好泰州雪醅著名蓋用州治客井蟹黃水紹興間有至都下用湖水釀成頗不逮有詰之者云蟹黃水重西湖水輕嘗較以權

衡得之

蘇軾乞開西湖狀天下官酒之盛未有如杭者也歲課二十餘萬繙水泉之用仰給

於湖若湖漸淺狹水不應溝當勞人遠取山泉歲不下二十萬工此西湖之不可廢者五也袁宏道飲第六橋酒壚上詩流芳亭畔草如油墮粉吹香歷幾秋鄂國有祠爭下馬西陵無主漫登樓玉瓏釀熟多酬直土哺魚肥易上釣南北諸峰收不盡朝朝放艇過溪頭

百花酒

神仙傳仙姥餘杭人嫁於西湖農家善採

百花釀酒後服化去

虎跑泉酒

錢塘縣志取虎跑泉釀者名虎跑泉酒

味極醇

珍珠泉酒

淨慈寺志珍珠園在雷峰之陰內有泉

迸出累累如貫珠官庫取以釀酒西湖志類鈔真

珠泉宋景祐中官家取以釀酒遂以為酒名

談薈宋南

渡京醞有雪醅真珠泉皇都春有美堂中和堂皇華堂

荷花麴

名勝志金沙澗其地產荷花宋南渡時取

以製麴釀酒因立麴院

周紫芝與張尚書論移麴院書戶部之有麴院其在

西湖閱六七年為麴六百餘萬斤官獲其利三十餘萬緡不為不多矣其為利可數而陳也議者乃欲徙而遷之不知其何苦而為是哉酒與麴須水而成水善則美水惡則散不可不擇也西湖之水清甘如飴歲取而用未嘗或失今之所遷地瀕濁港用竹為筒以引河流不下百丈灌以江潮其味甚鹹人或以此難之則又欲鑿井取泉而不知泉脈之來是亦江潮而已前日議者謂某若謂水鹹不知龍山南外江漲北外當用何水某告以龍山用鴻鴈池水南外用巡檢司大井水江漲用下湖

水北外亦用下湖水下湖者西湖之外流也議者無以爲對往歲京師麴院止用一井其味極苦人不能嘗然麴非此水不成其後徒置博士橋而麴屢壞乃復故處以此知水置之不可不擇也周文璞麴坊詩麴坊纔盡上湖船笑問雲山欠酒錢兩行柳絲黃不斷不知身去御園邊

寶雲茶

咸淳臨安志寶雲菴產者名寶雲茶

香林茶

咸淳臨安志下竺香林洞產者名香林茶

白雲茶

咸淳臨安志上竺白雲峰產者名白雲茶

東坡詩白雲峰下雨槍新

龍井茶

萬曆杭州府志老龍井其地產茶爲兩山

絕品錢塘縣志茶出龍井者作豆花香名龍井茶

色青味甘又翁家山亦產茶最下者法華山石人

塢茶而龍井法相僧收以語四方人曰本山

快雪堂集

昨同徐茂吳至老龍井買茶小民十數家各出茶
茂吳以次點試皆以爲贗曰真者甘而不冽稍冽
便爲諸山贗品得一二兩以爲真物試之果甘香
若蘭而山人及寺僧反以茂吳爲非吾亦不能置
辨僞物亂真如此劉瑛謝龍井僧寄茶詩春茗初
收穀雨前老僧分惠意殷虔也知顧渚無雙品煩
試吳山第一泉竹裏細烹清睡思風前小啜悟譚
禪相酬擬作長歌贈淺薄何能繼玉川王寅龍井
試茶詩昔嘗顧渚茗鑿得金沙泉舊游懷莫置幽
事復依然綠染龍波上香塞穀雨前況於山寺裏
藉此可談禪于若瀛龍井茶歌西湖之西開龍井
烟霞近接南峰嶺飛流密汨寫幽壑石磴紆曲片
雲冷拄杖尋源到上方松枝半落澄潭靜銅瓶試
取烹新茶濤起龍團沸穀芽中頂無須憂獸跡湖

山豈懼涸金沙漫道白芽雙井嬾未必紅泥方印
嘉世人品茶未嘗見但說天池與陽羨豈知新茗
煮新泉團黃分列浮甌面二槍
浪白附三篇一串應輸錢五萬

安樂山茶

西溪梵隱志安樂山春日焙茶石塢香

聞十里

湖水

六研齋筆記武林西湖水取貯五石大缸澄

淀六七日有風雨則覆晴則露使受日月星之氣
用以烹茶甘淳有味不遜慧麓以其溪谷奔注涵
浸凝渟非復一水取精多而味自足耳

絲 西湖人家多勤女紅春時皆以養蠶繅絲爲業

顧若璞湖上縑絲曲
桃花花繁楊柳垂
纖腰嫩臉香風吹
鶯兒調聲聲正滑
堂上絲車鳴軋軋
少年騎馬挾金彈
青羃朱舠紛夾岸
縑絲終日不忍看
寒蟬早晚啼秋慢

湖綿

萬曆錢塘縣志

綿濯以西湖水者為東南最

程嘉燧湖南晚歸詩
湖頭新水出新綿
荷葉生時又一年
桑籬亂燒斜日裏
百層山翠萬條烟
張遂辰雨晴湖畔詩
積雨晴生桑柘烟
人家早覺翳鳴蟬
燒香山下游船少
新水涓涓正出綿

紙

快雪堂集宋人嘗造紙於玉泉
六研齋筆記杭

州北山玉泉池水曾置局作紙甚佳

青石

萬曆杭州府志錢塘南高峰出青石
土人採

之為金銀錫箔墩石極光膩
又用為搗衣石志石

碑石石瓜之類

天竺石

舊唐書白居易傳居易在杭州得天竺石

一華亭鶴二蘇州得太湖石五折腰菱俱置於里

第池上

釋居簡石賦并序飛來天竺講徒聚石作供爲之賦石奇而怪今有惜不惜石眠人

今猶人眠石夫二三子悠然會心攀高陟遐隱搜

細尋捫蘿鳥輕籊雲景沈俯闕嶽嶽側行岑峯磅礴

礪巖阿裴回礪陰洗濯雨蝕摩挲蘚侵獸駭始蹲

鸞回欲升介如其質鏘乎其音如琮璫璜如戛球

琳如獲大貝如致南金室邇今其何能及石遠今

輦無傭直屹如林兮若拱而揖百夫睨兮無用其

力若夫坡陀兮盤峭峙兮桓王佐才可致而不可

致權奇兮巧玲瓏兮小市鄺隱可致而不可鬻俯

疎簷而巍插挂綺疏而環植立中不倚凜姿淡如

却步欲前偃僂及趨匪卑媒尊匪親簡疎匪璞貴

雕匪瘠貴腴蔭之以線蕉密葉之涼友之以青琅
方寸之虛澤之以金莖沆瀣之清鑄之以石鼓斷
缺之餘堅不可鑄頑不可澤與將爲魯叟之堅乎
抑爲瞽叟之頑乎或曰是石也皆有飛來之一體
始焉飛來終將飛去固蕩誕漫詒今不可復據夜
半有力者負之而趨吾恐昧者不知今防之不預
因作而言曰小子識之庶乎一得今有補千慮姚
合天竺寺前立石詩補天殘片女媧拋撲落禪門
壓地拘霹靂劃深龍舊攫屈盤痕淺虎新抓苔粘
月眼風挑剔塵結雲頭雨盪敲秋至莫言長砭立
春來自有薜蘿交薛章憲袖歸天竺石詩奔泉激
射下層顛汨沒泥沙不記年貢比鉛松思往聖食
同薯蕷挾飛仙微皴頗訝龜紋拆稍瑩還疑
鵲卵圓袖裏攜歸呼石友銅盆貯水鬪精堅

瑪瑙石

咸淳臨安志

瑪瑙坡地有碎石若瑪瑙西

湖遊覽志

人多採之以鑄圖篆

西溪百詠序

瑪瑙

池底皆細石圓繡狀如瑪瑙

泥孩

江湖紀聞臨安風俗嬉遊湖上者相競買泥

孩鷺哥花湖船回家分送鄰里名曰湖上土宜白

獼隨迎春黃胖起於湧金門外地有杏花園游人

多取黃土戲捏為人形爾

張遂辰春遊詞半山落日促歸塗手抱泥孩出

酒壚爭擁六橋垂柳
下一舟近岸百人呼

西湖志卷之二十四

西湖志卷之二十五

冢墓一

冢人墓大夫之掌所以辨兆域也而有功居前不
列爵等尊卑之次禮意可知已自有西湖以來若
堂若釜者凡幾要惟功德在人而後墓厲有守不
然彼桓氏之槨豈真能與石不磨者耶志冢墓

孤山路

宋和靖處士林逋墓

夢梁錄林處士墓在孤山之

陰

詳名賢輟耕錄至元間釋氏豪橫各處陵寢發掘殆盡獨孤山林處士墓惟遺一玉簪時有人

作詩以悼之曰生前不繫黃金帶身後空餘白玉簪葉森修葺和靖先生墓堂記和靖先生墓在孤山宋紹興間建四聖延祥觀詔勿徙墓後葺祠宇金華王庭書和靖先生墓五字表墓道林泳爲記至元己卯江浙儒學提舉余謙德撫命森脩葺之復言於憲各捐俸助修始於是年四月廿三日成於五月十三日祀以少牢名其軒曰鶴軒萬曆杭植梅數百本於山之上德撫命森書石焉

州府志成化十年郡守李端重修邑人于冕沈恒

於墓上重種梅百樹

高翥拜林和靖墓詩玉函香骨老雲根占斷孤山水月村

薦菊泉清涵竹影種梅地冷帶苔痕生前已是全名節身後誰從問子孫惟有年年寒食日遊人來與酌芳樽吳惟信拜和靖墓詩墳草年年一度青梅花無主自飄零定知魂在梅花上只有春風喚得醒方岳林和靖墓詩結廬舊與青山對修竹蕭疎半不存惟有亭前古梅在暗香疎影幾黃昏徐

集孫重拜和靖先生墓詩秋聲爾許悲懷古若爲
思菊老泉堪薦山孤草亦萎高風留塑鶴殘雨暗
荒碑依舊梅千樹無花香似詩黃宜山題和靖墓
詩墳邊疎影尚橫斜鶴老苔荒處士家獨立東風
難著語只攜尊酒酌梅花吳錫疇林和靖墓詩遺
稿曾無封禪文鶴歸何處認孤墳清波千載梅花
共說著梅花定說君林景熙謁和靖墓詩回首咸
平夢清風自滿湖乾坤一士隱身世此山孤鶴去
空秋影梅開尚舊株耳孫今白髮持酒酌寒蕪薩
天錫和靖墓詩先生勝隱得孤山小艇沿湖日往
還自愛煙霞居物外豈知名姓落人間鶴無過跡
苔痕老梅自開花月影閒表墓有銘祠有奠高風
千載起廉頑張昱過林和靖墓詩西湖處士林君
復幾首梅詩直到今此事豈容同末俗當時還亦
有知音高車大旆應何往剩水殘山尚可吟三尺
孤墳埋宿莽過君誰不願抽簪周鼎過和靖墓詩
一邱千古獨巋然幾樹梅花抱墓田結就巢居猶
昨日塑來鶴立自何年澹煙流水斜陽外芳草新

亭古岸邊欲去徘徊城
月上裏湖猶有未歸船

國朝雍正十年浙江糧儲道朱倫瀚重葺

朱倫瀚重修
林和靖先生

墓記得志行道勲業表於世聲名傳於後此有所
建立於天下者之所爲也無所建立矣而稱之在
當時傳之在後世非其人立身行己自有不可泯
滅者由是而傳之稱之固不在勲業之有所表著
也耶和靖處士生宋咸平景德間是時宋運方昌
人才輩出其以事功政績著者史不勝書而處士
放浪江湖卒歸老於西湖之孤山以終其身如處
士者豈真無意於建樹耶何其生鄧隆之世而甘
以高蹈終也處士旣不用於世其爲處士之才與
識俱不可得而知跡其生平居西湖二十年不入
城市則其高風峻節有過人者矣至於識李諮於
未遇教其兄子策名於世則固未嘗無意於世者
俾處士而出其才與識有所作爲於天下事功政
績何遽不若人而處士卒不爲也則固自有所以

為處士者在矣余年弱冠過西湖弔處士墓尚及見老梅一本傳為處士手植年來承乏監司朝夕湖山之側一抔黃土較三十年前漸至塌毀而所謂手植之梅已不可復覩因捐俸葺其墓樹表以識墓之前後復增植梅花數十樹嗟嗟千百年來人之言梅花遊孤山者意中輒憬然有一處士在不知此皆非處士也墓之有無在處士固浮塵野馬視之知此意者其殆可與言處士矣因工竣之日復握管而為之記雍正十年二月

宋處士高翥墓

武林舊事字菊澗葬孤山後談家

山

明按察使副使柴祥墓

杭州府志在孤山

靈隱寺志祥號

醴泉天性篤孝官御史直諫有聲
陳情終養二十年鄉黨稱長者

宋率府沈君墓

萬曆錢塘縣志在西城

曾鞏率府沈君墓誌

君姓沈氏始自吳興徙家錢塘君以宗室密州觀察使宗旦恩累遷太子右司禦率府副率兼監察御史階銀青光祿大夫勲武騎尉嘉祐二年卒葬錢塘之西城

明孝童郭金科墓

錢塘縣志在表貞祠右

明孝友傳孝童

名金科錢塘人天性至孝火焚其廬金科年十五已脫於火不見母遂慟哭入火救母竟焚死明晨出其屍灰燼中子母相抱不解御史聞之命葬之孤山表曰郭孝童墓

南山路

元孝子丁鶴年墓

杭州府志在學士港之南園

堯山

堂外紀鶴年回回人嘗卜日葬其父霖雨不止鶴年仰天悲泣翼日雨止葬畢雨如初時兵亂後失

母墓所在悲慕深切夜夢母告以葬所鄰翁韓重者亦夢焉即其地求而得之見母屍正中一齒如漆復齧齒滴血試之良驗遂改祔父壙人呼丁孝子

明御史木訥墓

錢塘縣志在學士港口

明忠烈黃斌墓

萬曆錢塘縣志在學士港正統十

四年征處州賊葉宗留以忠烈戰歿於陣

明大學士謚文端高儀墓

萬曆杭州府志在南屏

山萬曆二年諭葬

呂調陽大學士高公墓誌公字子象別號南宇世籍錢塘舉進

士授編脩累陞禮部尚書乞休加太子少保歸逾年詔起於家日侍講於文華東序進文淵閣大學士計聞命以一品禮祭葬謚文端徐林鴻謁高文端墓詩雷峯隱隱藕花莊湖水青蒼半夕陽墓下

疎花吹燕雀城邊畫角散牛羊兩湖雨露遲仙馭
三殿風雲隱御牀辛苦受遺高相國手攜丹詔出

光明

明禮部尚書謚文僖倪謙墓

錢塘縣志在新亭鄉

陳鎬倪公傳公字克讓錢塘人正統己未進士歷官南京禮部尚書贈太子太保敕葬

宋莊文太子墓

咸淳臨安志在寶林院

建炎以來朝野雜記

太子初名愉紹興十六年補右率府更名愔乾道元年八月立咸淳臨安志寶林院開寶六年建名總持治平三年改今額乾道三年充莊文太子攢所香火院

宋皇子齊王墓

咸淳臨安志在廣法院

明孝子孫宗黻墓

杭州府志在慶樂園

錢塘縣志宗黻字仲

文幼有至性六歲喪父即知哀慕母楊鞠之相依
為命及長益竭誠奉養母終廬墓側逮免喪猶日
榜一舟至墓所泣奠年踰八十日扶掖至母氏
旌節坊下稽首終身不忘其親成化間旌表

明布政使叅議孫枝墓

杭州府志在南屏山之右

明昌化伯邵林墓

西湖遊覽志在九曜山

獻徵錄昌化伯

邵公林暨夫人楊氏實維太皇太后之考妣也先
是公與夫人俱早逝權厝於錢塘北山之青芝塢
嘉靖乙亥詔守臣擇地於南山之麓
而改葬焉賜諭祭建祠賜額曰發祥

明兵部員外郎陳學易墓清朴祠記在九曜山

學易自撰

生壙誌學易以萬曆庚寅生太平里甲子領賢書
庚辰就博士癸未五十四始徵南宮選旋移南駕
部年六十有四癸巳冬歸自銘其墓之石銘曰疇
曰蓄而無終歲粟疇曰嗣迺能善養志疇匪孝生

事祭葬力獨効疇匪悌極難課藝諸昆季友周兮
 幹蠱創守兮並苦踰壯薦鄉試半百方賜第理楚
 刑僉曰平不用兵亂者寧因轉南獲眎含飯寢爾
 苦遽爾潛北山之北南山之南適其適而恬其恬
 聞之者謂榮有爵貴有壽見之者謂羣不黨矜不
 爭猶然昔日之書生於乎今已矣俾後之人銘其
 阡曰此窮措大
 陳學易之墓門

國朝光祿寺卿龔佳引墓

錢塘縣志在青龍山

明長史瞿佑墓

杭州府志在甘溪

詳名賢

明府尹陳良器墓

萬曆杭州府志在甘溪

明太僕寺卿王榮墓

萬曆杭州府志在石屋嶺

分省

人物考王榮字希仁錢塘人永樂進士授全椒學
 訓導陞淮府左長史至宣宗朝歷官吏部都給事

中陞太僕少卿景泰中進太僕寺卿四年致仕歸天才快敏立朝五十餘年聲實並著

明刑部主事王謙墓

在石屋塢

徐一夔王自牧墓誌錢塘卓行之士

王君自牧諱謙以洪武八年卒年五十七無子其友相與治葬於南山石屋塢先塋之次君文學行誼不愧古人會有詔求前代遺逸有司以君薦授中書遷刑部主事尋引退平生所為文并詩自類為家集亦好道家自號壺父著壺夫書一卷

明禮部主事陳鏞墓

杭州府志在石屋嶺西

成化杭州

府志鏞字叔振錢塘人永樂乙未進士入翰林授禮部祠祭主事宣德三年征交南兵部尚書李慶贊軍務舉史安及鏞自輔二人屢進忠益驕恣不納至敗被執鏞顧安曰吾輩見危授命耳皆不屈死少師楊士奇表安墓敘兩人事甚悉鏞重厚清介表裏一由於正鄉邦稱之

明按察使馮覲墓

舊浙江通志在石屋嶺

明邵武同知諸燮墓

兩浙名賢錄在石屋嶺

宋皇子保寧軍節度使墓

咸淳臨安志六通慈德

院舊名惠德院治平二年改今額嘉泰四年充皇

子保寧軍節度使攢所

明高德暘墓

武林紀事在南山庶子鄒濟作銘

詳見

名賢

國朝處士柴紹炳墓

錢塘縣志在南山花家圩

宋景獻太子墓

武林舊事在法因院

咸淳臨安志法因院舊額

報慈大中祥符元年改今額嘉定十三年充景獻太子攢所

宋兩浙轉運使張鉉墓

咸淳臨安志在西湖佛手

山陸游誌其墓

舊浙江通志鉉秦之三陽人父宗元敷文閣待制鉉以恩任承事郎

歷兩浙轉運使委明州造船人或言其非勲閥所宜鉉謝曰吾處之懼弗稱敢薄之耶訖代去不以卑冗怠事

明京兆尹沈光祚墓

舊浙江通志在翁家山天啓

間諭葬

明許瓢隱墓

成化杭州府志在大慈山

明廣西布政使叅政朱鏞墓

在大慈山

張寧太中大夫廣西

布政司右叅政朱公墓誌弘治元年叅政朱公卒
公諱鏞字廷用號恒菴景泰丁丑進士授南京兵
部職方主事陞郎中出知廬州秩滿有廣西之
命以軍務行邊致仕歸壽六十七葬於大慈山

明知通州吳瓚墓

武林紀事在大慈山

詳名賢陳堯道武林

紀事後序武林紀事四冊自一卷至六卷則紀武
林事續後二卷則紀聞見事乃樂閒吳先生瓚稽
考諸書會萃成編者也先生年八十餘註書立言
手不釋卷真天地間之完人而吾輩之所當法者

明江西提學查允元墓

江西通志在虎跑大慈山

明禮部郎中張懋忠墓

舊浙江通志在白鶴峰孫

媳孝婦郭氏祔

明處士王必顯墓

錢塘縣志在白鶴峰

元臨淮縣尹蔣會隆墓 在玉岑山

程鑑夫臨淮縣尹蔣君墓誌濠

上蔣君會隆官淮東道儒學副提舉遷淮安路臨淮縣尹以大德乙巳卒墓在錢塘縣玉岑山

明贈叅政黃慶墓

錢塘縣志在南高峰玉岑山慶

有隱德稱為長者

明處士吳博墓

杭州府志在玉岑山

舊浙江通志博嘉靖間布

衣宮詹太沖其曾孫也原籍海鹽母殷年十九遭家變襁負其子遷武林吳氏之籍武林由處士始

明學士王獻墓

杭州府志在玉岑山下成化二十

三年諭葬遣官營墓

王領王學士墓誌公諱獻字惟仁仁和人景泰進士授編

修官至禮部左侍郎先後握院章者十有六年

宋成穆郭皇后攢宮

咸淳臨安志在錢湖門外修

吉寺

宋史后妃傳后開封祥符人奉直大夫直卿之女孫孝宗為普安郡王時納焉封咸寧郡

夫人生光宗孝宗受禪追冊為皇后謚恭懷尋改安穆及營阜陵又改成穆建炎以來朝野雜記郭后孝宗之正配也權攢於北山修吉寺

宋成恭夏皇后攢宮

咸淳臨安志在錢湖門外修

吉寺

宋史后妃傳后宜春人初入宮為憲聖皇后閣中侍御普安郡王夫人郭氏歿太后以賜

王封齊安郡夫人即位進賢妃踰年奉上皇命立為皇后乾道三年謚安恭寧宗時改謚成恭

宋慈懿李皇后攢宮

咸淳臨安志在錢湖門外修

吉寺

建炎以來朝野雜記后安陽人父道為湖北帥有皇甫坦者至其第道命諸女拜之其中

女慈懿后也皇甫見之驚曰此天下人母我奈何受其拜耶孝宗聞坦語即為恭王聘之淳熙十六年立為皇后紹熙五年七月稱太上皇后慶元六年終壽康宮謚慈懿

宋恭淑韓皇后攢宮

咸淳臨安志在錢湖門外修

吉寺

建炎以來朝野雜記后相州人魏忠獻王琦六世孫淳熙十二年歸平安郡王邸第封新

安郡夫人十六年受禪立為皇后慶元七年葬慈懿皇后攢宮之東廣教寺謚恭淑

宋成國公主攢所

咸淳臨安志在惠因寺

武林舊事高麗

寺舊名惠因寺皇姑成國公主攢所

少師葉仲愈墓

萬曆杭州府志在大慈鄉赤山

謹按萬曆杭州府志少師葉仲愈墓不載時代未敢以他籍疑似者強相附麗爰據文錄存以備稽

考後
倣此

元儒學提舉葉廣居墓

杭州府志在赤山詳名賢

明湖廣叅議周文墓

杭州府志在高麗寺分省人物考文

字宗武仁和人永樂甲申進士授翰林出為兵部員外轉湖廣叅議卒部民擁道哀號至為服以送

歸
櫬

宋少保忠勇李寶墓

武林舊事在定香橋唐際盛少保李

公神道碑宋忠勇李公寶南渡後飛將也高宗時淮浙奸民造舟潞河由海道襲兩浙謀聞倉卒命將授公浙東路副總管駐平江捍海公抵江上遡西北風出大洋行三日風愈厲公酹酒自誓神色不沮方趣進師風又大作濤湧如山公行益奮時海州重圍旌麾彌望引兵登岸鼓行而前敵出不

意為奪氣解去公獎誘忠義勉以功名招集降附
高宗聞之喜曰朕自用寶果立首功敕書忠勇表
其旌旗就除節度制置二品
賞錫有加卒贈檢校少保

明兵部尚書方賓墓

成化杭州府志在法公埠

明兵部尚書贈太傅謚忠肅于謙墓

名勝志在三

台山

詳名賢西湖遊覽志成化二年遣行人馬璇
諭祭弘治七年賜謚曰肅愍建祠曰旌功萬

曆十八年改謚忠肅陸弼于忠肅墓詩荒墳鄰近
鄂王宮異代孤臣伏臘同北狩忽聞哀痛詔中興
多仗保釐功百年天地同元氣五夜松杉度烈風
聖世祇今恢廟畧玉門聞已罷和戎陸荼謁于忠
肅墓詩荒祠殘碣兩峰秋社稷功高未乞休自信
丹心成鐵石已拚碧血染松楸黃龍塞遠枝南向
白馬江寒水逆流千古英雄
精爽在臨風憑弔淚難收

明僉都御史許子良墓

錢塘縣志在三台山萬曆

三十二年諭祭葬

明吏部尚書謚恭懿張瀚墓

杭州府志在三台山

萬曆間諭葬

詳名賢

明吏部員外郎錢養廉墓

舊浙江通志在三台山

杭州府志字國維仁和人萬曆己丑進士授工部都水司主事尋補吏部考功署郎中事張位當國要結大璫與吏部爭權尚書孫丕揚以清望特用養廉非閣臣意丕揚去養廉調驗封尋奪官歸

明湖廣副使許文岐墓

杭州府志在中台山

明福建按察使沈循墓

杭州府志在中台山

明刑部郎中項麒墓

萬曆杭州府志在馬婆嶺下

西湖遊覽志麒字文祥仁和人景泰間以貢士授南京吏部司務陞南京刑部郎中以病告歸卒年

八十

明高士高鎧墓

錢塘縣志在馬婆嶺鎧孝事繼母

撫育羣弟有司旌其孝義壽九十有三

明吏部郎中張信墓

萬曆杭州府志在馬婆嶺子

太僕丞瑛孫廣西叅議銓祔

明河南布政司叅政查志立墓

河南通志在馬婆

嶺

宋貴妃賈氏攢所

咸淳臨安志在崇恩演福寺

武林

舊事崇恩演福寺寶祐丁巳重建為賈貴妃攢所

宋周漢公主攢所

建炎以來朝野雜記在演福寺

咸淳臨安志寺在小麥嶺淳祐八年充惠順貴妃賈氏攢所景定三年周漢國端孝公主祔焉

宋雍王墓

成化杭州府志在崇報顯慶院

宋樞密金淵墓

武林舊事在小麥嶺樞密號冰壑

嘗作書堂於此因葬焉

宋金紫強至墓

萬曆杭州府志在小麥嶺

武林舊事至字

幾聖今石羊虎猶存其子淵明墓在西溪欽賢鄉諸子多祔此夢梁錄強文憲強淵明墓並在西溪

宋張夫人墓

四朝聞見錄慈明楊太后母張夫人

初被憲聖幸後歸李氏葬西湖小麥嶺地名放馬場

宋翁孟寅墓

咸淳臨安志在小麥嶺孟寅字賓暘

號五峰

明都督僉事張真墓

錢塘縣志在小麥嶺成化七

年諭葬

魏驥鎮守浙江左軍都督僉事進階榮祿大夫張公墓誌公諱真字以誠靖難時以

武臣子弟援扈從功授彭城衛正千戶陞指揮同知陞徐州衛指揮使調浙江臨山衛陞浙江都指揮使僉事陞署左軍都督府都督僉事鎮守浙江平金華處州盜實授都督僉事加驃騎將軍上輕

車尉兼掌浙江都指揮使司事年七十二致仕卒年九十四葬於錢塘北山之原

宋郇國公贈太尉謚文憲章得象墓 萬曆杭州府

志在棲真院側宋史本傳得象字希言浦城人進士及第楊億以其有公輔器薦之

歷知制誥翰林院學士官至鎮安軍節度使同平章事封郇國公贈太尉謚文憲

宋徐伸墓 萬曆杭州府志在棲真院武林舊事徐典樂名伸字

幹臣號青山翁

明真人周思得墓 杭州府志在八盤嶺詳方外

明吏部侍郎李旻墓 舊浙江通志在八盤嶺賜祭

葬詳名賢

明廣西布政使沈敬墓

萬曆杭州府志在丁家山

成化中諭祭

分省人物考敬字克欽錢塘人正統進士累轉廣西左布政使時田州黃

明倡亂率師克捷入賊巢中毒死

明副使陳洪範墓

錢塘縣志在丁家山

元俞和墓

在仙芝塢

徐一夔俞子中墓碣子中諱和別號紫芝桐廬人父章遊

錢塘因家焉子中時得趙文敏用筆之法極力攻書篆楷行草各臻於妙用文敏私印莫辨其贋文章鉅家如黃文獻潛陳監丞旅每為文必致子中書之至正初朝廷修遼金宋三史移文江浙行省繕寫鏤板遣翰林應奉張公翥視工屬子中校正有司奉幣請入局既竣事行省參知政事秦公擬以學校官處之子中固謝其居有醉墨軒以洪武十五年葬於南山仙芝塢

明御史姚奇引墓

杭州府志在穎秀山

吳越太尉開府儀同三司謚貞獻薛居正墓

咸淳

臨安志在靈石山冢前生紫藤遍繞三峰之上其

三世孫昂官尚書左丞葬天竺山妙法院

元句曲外史張雨墓

萬曆杭州府志在靈石山玉

鈎橋

詳方外西湖遊覽志墓近玉鈎橋伯雨賣玉鈎所建也墓久頽廢成化間嘉興姚公綬復

葺之爲立傳又爲之銘曰此句曲外史居貞先生張公墓也南屏之右西湖之陽梁題玉鈎澗渡靈

石路披篠樹塢帶煙霞石室藏書碑文紀事其形雖逝其神則存翰墨在人文章垂世儼然生氣之

張皇聲歎無聲周旋滅影穆若太虛而示寂開元精舍久無繼續之賢句曲居貞全乏訪求之彥遂

使墓門荒翳兆趾摧崩松柏摧為薪莫設時樵之
禁身世是何物曾罹夜客之侵痛茲劍躍雷津慨
爾硯離玉匣既往無咎將來可圖曠世而默契予
心尚友而景行前哲姚綬題張伯雨墓詩百年尚
友重文章登拜孤墳一瓣香赤壁舟中驚鶴夢玉
鈎橋下奠椒漿匣藏神劍猶生氣雲閔秋山自老
蒼雙眼摩娑舊碑刻還疑清夜吐虹光仙去端依
絳節朝仙壇環佩竟寥寥字收渤海千軍陣詩逼
成都萬里橋黃篋樓空焦炬入清風堂廢白雲銷
惟餘靈石山頭月千古風華不待招

明贛州知府沈南金墓

在靈石山

許相卿中順大
夫贛州知府沈

公墓誌公諱南金字子輕家世郡城人為錢塘博
士諸生嘉靖二年舉進士授南京大理寺右評事
歷寺正遷廣東廉州府補江西贛州府老於家
嘉靖三十一年卒年七十九葬於靈石山之陽

唐陳拾遺墓

武林舊事拾遺唐人歲久莫考名字

在積慶山下

宋樞密呂思恭墓

在積慶山

陳造樞密呂君墓誌君諱思恭字禮夫東

平人自承信郎積官至樞密院葬錢塘積慶山之原

元徵士王泰來墓

在積慶山

趙孟頫有元徵士王公墓誌公諱泰來字

復元其先大名人宋三槐文正公之裔因薦館於集賢院乞歸居錢塘自號月友處士公生於宋端平三年卒於至大元年年七十三葬於西湖茅家埠積慶山之陽

元賢婦趙夫人墓

在積慶山

徐一夔崔母趙夫人墓誌錢塘崔晟之母

曰趙夫人諱淑端魏國公孟頫之孫女湖州路總管雍之女處士崔復之妻寇陷錢塘處士遇害夫人奉舅姑神主以出教子成家喜觀書史有涉女事者記以自箴一時俱稱其賢洪武六年葬於錢

塘縣履泰鄉
積慶山先塋

明兵部尚書徐琦墓

錢塘縣志在積慶山

魏驥南京兵部

尚書徐公墓誌公諱琦字良玉錢塘縣之江頭人登進士擢行人司歷陞南京兵部尚書敕有祇事國家勤勞茂著之褒景泰三年卒誥贈資政大夫享年九十有八四年詔遣禮部諭祭工部營葬墓在錢塘縣履泰鄉之原西湖遊覽志徐尚書琦宣德初以左通政使安南黎利餽金珠香繒悉却之少師楊士奇畫梅題詩贈之云兩度安南奉使來玉葩曾見嶺頭梅天朝使者清於玉不帶飛塵半點回

明廣西布政使叅議吳鼎墓

在積慶山

許相卿泉亭吳先生

墓誌嘉靖二十四年泉亭吳先生卒誌曰吳君諱鼎字維新錢塘城北隅人正德中進士尹臨淮縣

時毅皇帝南征有中貴道臨淮非分徵索君銳身
先吏民擊傷中貴遂奏逮詔獄廷議白君還治徵
為南京刑部主事轉禮部郎中遷廣西布政
使左叅議卒年五十三墓在積慶山南麓

明雲南布政使陳善墓

舊浙江通志在積慶山詳見

名賢

宋關景仁夫人周氏墓

在履泰鄉

曾鞏關夫人周氏墓誌夫人諱

琬字東玉嫁關氏為徐州豐縣令景仁之妻卒
於治平二年葬履泰鄉葛松原關氏錢塘人也

宋太府寺丞陳剛中墓

武林舊事在風篁嶺沙盆

塢

萬曆杭州府志剛中福州福清人建炎二年登
第任太府寺丞應詔上封事主議恢復忤秦檜

編脩胡銓貶新州剛中啓賀其行云屈膝請和知
廟堂禦侮之無策張膽論事喜樞庭經遠之有人

遂與張九成等七人同謫差知安遠縣有詩云同
日七人俱去國何時萬里許還家既至縣感瘴而
歿其妻子扶柩
抵臨安葬焉

明都御史李昂墓

錢塘縣志在風篁嶺下

舊浙江通志昂

字文舉仁和人景泰甲戌進士成化間出知青州
屬歲饑昂請發廩以濟在治八年墾田至五千餘
頃活饑民二十餘萬民列其治行三十四事立祠
表海亭尋陞福建左叅政歷官都察院副都御史
弘治間討平劇賊楊九隆等民蠻讐服兩廣江右
湖湘閩浙羣盜竊發昂親入賊巢斬獲以萬計改
督漕運開河濬源卒賜祭葬大司馬華容劉大夏
表其墓曰語云馬或奔蹏而致千里士或有負俗
之累而立功名如文舉長才遠畧所至
輒有建樹卓卓可紀彼其所存者大矣

明雲南巡撫都御史吳誠墓 在風篁嶺

張弼都察院右副都

御史吳公墓誌公諱誠字尚忠景泰辛未進士官
拜右副都御史巡撫湖廣時交趾弄兵敕巡撫雲
南公奮擊賊衆雲南輯寧卒於官黔國公遣官
歸櫬於鄉賜祭葬如禮葬於龍井山之風篁嶺

明廣東按察使副使許嶽墓

在風篁嶺

茅坤少厓
許公墓表

予由西湖步風篁嶺東望封中佳氣其爲馬鬣之
阡固按察許少厓公自爲墓宮以待百年者也公
歿其子卜葬焉太子少保張公銘其墓武林怡老
會詩集許嶽字子峻仕爲南京工部主事歷員外
郎中直隸常州廣西柳州梧州三
府知府廣東按察司副使致仕

明太常寺少卿陳贄墓

萬曆杭州府志在風篁嶺

龍井山之原子右通政嘉猷

附詳名賢

國朝德興知縣王起彪墓

錢塘縣志在龍井風篁嶺

學使王掞題曰異烈孤忠

李之芳表忠錄集虎子王公諱起彪以春秋成

進士授德興令三月化行而鄰封寇起公討之不克罵賊而死

吳越國元妃仰氏墓

咸淳臨安志在龍井山放馬

場

干國春秋仰氏湖州人天福八年冬忠獻王納為元妃

宋兵部侍郎胡則墓

萬曆杭州府志在龍井廣福

院之麓

詳名賢范仲淹胡公墓誌寶元三年葬夫人潁川郡君陳氏祔

宋知婺州東陽縣楊翱墓

在龍井

王安石太常博士楊君夫人金

華縣君吳氏墓誌故太常博士知婺州東陽縣事

楊君諱翱字翰之夫人金華縣君吳氏葬於錢塘

履泰鄉龍井之原楊君之卒也年六十七以慶曆

二年從其先人已葬而夫人後君十六年以卒時

嘉祐二年年七十三而以明年祔於楊君之墓子端子蟠同時進士

宋浮梁尉吳天秩墓

武林紀事在龍井

韋驤吳平甫墓誌平

甫諱天秩初補太廟齋郎出為大庾縣尉調浮梁縣尉卒於官世為杭人平甫工於為文有集五十卷卒於元豐三年葬於錢塘履泰鄉龍井之原合室邵氏而葬焉謹按平甫集不傳其題名見於南屏石屋摩崖今尚存

宋主簿關君妻曾氏墓

在龍井

曾鞏鄆州平陰縣主簿關君妻曾氏

墓表關君景暉妻姓曾氏建昌南豐人鞏之長妹也嘉祐二年卒六年葬於杭州錢塘縣履泰鄉龍井之原

承宣使方茂榮世墓

在龍井方山

王逢題方德玉先隴瑞芝卷德

王之先扈高宗家臨安其六世祖茂榮昭慶軍承宣使生椿年榮州防禦使生待舉恩州防禦使生好問殿前都指揮使判太醫局生中廣東提刑亦判醫生壽孫仕元廣平路醫學教授咸葬龍井之方山其地負金鐘靈石至正二十三年夏四月芝一本產指揮墓上予因序之并為詩紀其事

明贈禮部尚書汪諧墓

杭州府志在龍井弘治十

三年諭葬子太常卿舉祔

分省人物考諧字伯諧仁和人天順進士授編

修累陞禮部右侍郎兼學士請老年六十八贈禮部尚書

明刑部侍郎沈銳墓

錢塘縣志在龍井

分省人物考銳字文

進仁和人成化進士授刑部主事陞應天府尹南京刑部右侍郎乞歸

明大理寺卿陳珂墓

杭州府志在龍井

分省人物考珂字希

白錢塘人弘治進士授刑部主事歷陞都察院副都御史巡撫河南入為大理寺正卿致仕

明處士費鏞墓 在龍井

邵經邦處士費西村墓誌鏞字鳴遠世為錢塘人嘉

靖乙巳葬於龍井山

明四川按察使僉事沈瑞臨墓

錢塘縣志在龍井

劉安山

舊浙江通志瑞臨篤志理學操行醇粹四方宗之稱為約菴先生官終四川按察使

僉事

明太常寺卿嚴大紀墓

舊浙江通志在陸家坵

陳秘書監褚玠墓

錢塘志補褚氏家譜云玠字良

璧陳時官秘書監卒葬九溪

謹按南史本傳玠字溫理天嘉中兼通直散騎常侍遷中書侍郎除山陰令累遷御史中丞卒贈秘書監今家譜字曰良璧或別有所據者耶

宋貴妃黃氏攢所

武林舊事在西蓮瑞相院建炎以來

朝野雜記貴妃黃氏光宗後宮淳熙末上在東宮高宗以和義郡夫人黃氏賜之及即位拜為妃

宋貴妃蔡氏攢所

咸淳臨安志在淨教院宋史后妃傳貴

妃蔡氏初入宮為紅霞帔封和義郡夫人進婉容淳熙十年冬拜貴妃

宋贈秘閣修撰徐應鑣墓

杭州府志在方家峪武林

紀事應鑣字巨翁江山人咸淳末補太學生德祐二年元伯顏師次皋亭山三宮皆北行應鑣與子曰琦曰崧女元娘誓不降登梯雲樓縱火自焚僕見鑣父子儼坐如塑驚撲滅之鑣與子女出戶不

知所之翌日得於井中皆僵立瞪目如生殯西湖金井僧舍益王褒其節贈朝奉郎秘閣脩撰後十年同舍生劉汝均率儒生收葬方家峪廣嚴院側號正節先生弘治正德年間為建祠賜號忠節

明兵部侍郎何琮墓

錢塘縣志在方家峪弘治二

年賜祭葬

詳名賢

宋劉妃墓

董嗣杲西湖百詠引在方家峪鳳凰山

下褒親崇壽院後紹興中高宗敕葬妃子於此

武林

舊事

劉氏臨安人紹興十年為紅霞帔十六年封

才人轉婕妤婉容二十四年進賢妃無名氏題劉

妃墳詩

秋風落盡故宮槐江上芙蓉並蒂

開留得君王不歸去鳳凰山下起樓臺

吳越國恭懿夫人吳氏墓

錢塘志補在慈雲嶺西

原

吳越備史夫人吳氏名漢月錢塘人中直指揮使珂女也幼以婉淑奉文穆王元瓘性慈惠而

節儉每聞王決事有及重刑者常頻感以仁恕為言諸吳每有遷秩皆峻阻之及其入對多加訓厲故諸吳終夫人之世不甚驕恣敕封吳越國順德太夫人廣順二年謚恭懿

明劉英墓

在慈雲嶺

詳名賢程敏政賓山劉君墓誌此杭詩人賓山劉君之墓

君字邦彥世居錢塘北郭之夾城里君為詩精妥流逸兼備眾體三吳兩浙之言詩者必曰邦彥天順中郡欲以明經起君君以母老固辭其別業在甘泉里多竹榜其室曰竹東晚號賓山皆終隱之意也卒年七十二葬南山慈雲嶺

明禮部主事傅巖墓

杭州府志在慈雲嶺下施家

山

齊高士褚伯玉墓

錢塘志補伯玉爲尚書令湛之

子生三子孟邦仲都季郡葬龍山

西湖遊覽志伯玉字元璩錢塘

人少有隱操寡嗜欲往剡居瀑布山三十餘年齊高帝手詔吳會二郡以禮迎遣辭疾上不欲違其

志敕於剡白石山

立太平館居之

梁博士褚仲都墓

在龍山

錢塘志補仲都字子京伯玉次子精周易之學

梁時爲五經博士生子修卒六十一葬龍山

梁褚蒙墓

錢塘志補蒙字治卿濠之子卒葬茶花

山

吳越國文穆王墓

歷代山陵考在龍山之南

吳越備史

元瓘武肅王第七子在位十年謚文穆和凝文穆
王神道碑雲起龍驤化爲侯王鴻騫鳳翥鶚立鷹
揚凜然勁氣卓爾雄銳大名之後五世其昌武肅
開基奄有吳越恩洽百城名馳雙闕旣委招懷復
專征伐裂土苴茅秉麾仗鉞尚父乘代元帥承家
傳榮襲慶弈葉重葩有典有則去甚去奢威名炫
赫事望光華譚藪縱橫詞泉浩渺曹植思遲崔儼
書少月夕花朝猿巖雁沼筆落彩箋風清綠篠神
傳射訣天富兵鈴龜文月角燕頤虬髯威熊伏獸
名可愈疔撫衆以惠待士持謙事必有恒政皆求
理扶弱遏強先人後己但見偃風莫聞狎水阜康
烝黎廓清邊鄙量陂素廣德岳彌高禮延耆碩令
肅權豪庭趨忠烈府集英髦講論韜畧獎勸勲勞
自靖稱藩益勤述職虔布詔命動遵楷式每陳貢
輸常踰萬億表率方隅匡扶社稷功庸罕對渥澤
無倫禮優伯舅位極人臣鎔金鑄玉龜鑑龍綸永
承當代莫繼芳塵禁暴戢兵取威定霸方賴控臨
忽聞薨謝雲慘長空星沉永夜號慟軍民涕泗華

夏初聞訃奏尋輟視朝深嗟旦奭不及松喬倍加
贈祿久罷簫韶君臣分至水陸程遙間傑淪亡英
賢繼襲擗踊悲摧無所迨及益務撫循加之周給
人情既安兵威自戢一方肅靜三世耀榮朝宗事
大誓志傾城欲光家世上奉聖明願書貞石用顯
聲名金玉令人鼓旗良帥德盛功崇文經武緯述
之莫窮言之無愧庶幾乎百世千秋人見之爲墮
淚兩湖塵談錢氏有兩浙三世四王東坡稱墳墓
之在錢塘者十有四暇日曾一披尋有所謂錢王
墳者山勢迴環氣局壯偉有邱隆然其前石獸數
枚制甚奇古不類今時所見一碑甚鉅字雖剝落
尚隱隱可讀石晉天福二年立稱守尚書令中書
令吳越國王蓋文穆元瓘墓也其餘則皆湮沒無
存錢氏保障浙民東坡之文盡之無復庸議但數
百年之後豈惟漫爲禾黍且
邱壠其間而往迹盡廢矣

吳越國忠獻王墓

歷代山陵考在錢塘縣龍山之

西南

十國春秋王名弘佐文穆王第六子在位七年謚忠獻太常卿張昭撰神道碑

宋太常少卿沈周墓

在龍山

王安石太常少卿分司南京沈公墓誌皇

祐三年太常少卿分司南京錢塘沈公卒明年子扶子括葬公錢塘龍居里先公尚書之兆公諱周字望之以進士起家監蘇州酒爲侍御史按察江東自請得明州遂以分司歸第卒年七十四更十

三官

宋壽昌縣太君許氏墓

在龍山

曾鞏壽昌縣太君許氏墓誌夫人許

氏蘇州吳縣人嫁沈氏其夫諱周太常少卿贈尚書刑部侍郎杭州錢塘人夫人以熙寧元年卒年八十三二年合葬錢塘縣龍居原子曰扶曰括有文學

宋司農少卿沈振墓

在龍山

沈遼伯少卿埋銘公諱振字發之世爲錢

塘人以大祠郎起家歷上高臨淮二縣主簿遷茶陵縣令以薦改大理寺丞遷太子中舍知剡縣移巴西縣改金華縣封殿中丞仁宗祀明堂拜國子博士出知藤州轉虞部員外郎進比部員外郎通判衛州英宗即位以比部郎中乞監灊山靈仙觀今上即位拜司農少卿封長興縣開國男食邑三百戶以熙寧六年卒於河東私第享年七十三以明年二月葬龍山先塋之左

宋樂安郡君翟氏墓

在龍山

王安石樂安郡君翟氏墓誌尚書主客員

外郎錢塘沈君名扶之夫人翟氏以治平三年卒於京師男曰某翰林學士右諫議大夫知制誥曰迴泰州軍事判官曰遼將作監主簿監壽州酒曰邀漳浦縣主簿曰迨將作監主簿今上即位翰林守杭州夫人既卒詔以主客守蘇州葬夫人杭州錢塘縣龍居山舅姑之兆

謹按長子不書名此沈邁也字文通後以字行此不書名蓋南宋時刻臨川集避高宗嫌名去之也

宋雲巢先生沈遼墓

在龍山

雲巢集附錄遼字獻達世為錢塘人應有

司不中乃次翰林公任為將作監主簿後監杭州軍資庫以被誣奪官徙永州改池州卒元豐八年也還葬錢塘縣龍山著雲巢集十卷

明僉都御史鄭顥墓

在龍山

魏驥中憲大夫鄭公墓誌都察院右僉都

御史調福建按察司副使鄭公卒天順元年也明年葬於龍山先塋之次公諱顥字士昂號思菴遠祖從宋南渡遂為錢塘人宣德間膺鄉薦明年會試中乙榜授江西撫州樂安學教諭以平賊功楊文貞薦擢御史陞雲南按察司副使歷大理寺少卿陞左僉都御史仍還雲南天順改元調福建按察司副使卒於建寧之分司

明封御史顧邨墓

在龍山

余寅顧公墓碑公諱邨字希曾曾大父自平湖

徙仁和為掾得尉龍溪遷清流簿是時閩徵粵兵
勦山寇公至輒布方畧以子鈐官福建道御史封
公如子官年八十
二葬於龍山之原

元敦武校尉鄒世聞墓

在鳳凰山

徐一夔元敦武校尉益都翼管

軍上百戶鄒君墓誌君諱世聞字文達登州黃縣
人世以武弁起家至正初告襲階進義校尉從討
峒寇得款附張氏陷姑蘇有官資者多附之君怒
罵自度年老乃屏居峽石享年六十八葬於錢塘
鳳凰山擔
水關之原

明都御史張本墓

萬曆杭州府志在鳳凰山報國

寺傍

明中書舍人吳潮墓

錢塘縣志在鳳凰山北觀音

洞

國朝御史顧豹文墓

在吳家山

錢塘縣志豹文字季蔚順治乙未進士知

真陽縣行取為御史乞休享年七十五

明禮部尚書謚文昭江瀾墓

萬曆杭州府志在妙

因山

獻徵錄瀾字文瀾仁和人成化進士除編脩歷陞禮部尚書諭葬贈太子少保謚文昭

明光祿寺少卿吳果墓

在龍華山

焦竑光祿寺少卿小江吳君暨

配宜人高氏墓誌君諱果字行甫別號小江世居錢塘都御史誠之曾孫父源江西按察副使君從憲副入燕見滄茅公以長女字之會女卒高文端公以女歸君君以中舍給事殿庭與修大明會典世廟實錄成陞大理寺評事兼翰林典簿晉郎中陞光祿寺少卿疏言文淵閣藏書宜謹上嘉納之

以年老乞歸享年六十
九與宜人合葬龍華山

國朝工部尚書謚文和陳斆永墓

舊浙江通志在八

卦田

宋陶叔獻墓

在月輪山

沈邁陶叔獻墓誌廬江陶叔獻字元之廬江人父方

左侍禁杭州巡檢始家焉叔獻以皇祐元年三月登進士四月卒於京師與其考妣序葬於月輪山之東原嘉祐八年也

明知府翁汝遇叅政翁汝進墓

杭州府志俱在六

和塔

杭州府志汝遇字子先仁和人萬曆戊辰進士初授東莞令權蕪關最後守朝歌俱有惠

政弟汝進字獻甫萬曆乙未進士授興化縣歷官至山東叅政以忤逆璫魏忠賢罷歸

明張振淵墓

舊浙江通志在六和塔之左世稱彥

陵先生

明施節婦徐氏墓

吳太沖施節婦墓誌錢塘處士

施繼山妻徐氏守貞苦節卒葬六和塔月輪山之

麓

宋提刑陸廣墓

在范村

王安石京東提點刑獄陸君墓誌提點京東諸州軍

刑獄公事兼本路勸農事朝奉郎尚書司封員外郎充集賢校理上輕車都尉賜緋魚袋借紫陸君諱廣字彥博其先吳郡人曾祖諱景遷仕吳越爲驍騎上將官檢校太傅祖諱崇宸以威武軍觀察推官從歸京師君以天聖二年進士起至皇祐四年以使走齊州卒於鄆之平陰以嘉祐六年正月

歸君於錢塘
范村之穴

宋右文殿修撰周杞墓

夢梁錄在徐范村之間

咸淳

臨安志杞龍圖格之弟也建炎三年知常州值苗
劉之變倡義勤王以功除右文殿脩撰洪內翰邁
跋其檄書謂公聞變憤踊即飛表請反正適忠穆
呂衛公制置淮浙兼領建康即馳介貽書議起兵
勤王協謀於是忠穆公及諸大將皆提兵境上凡
軍之百役芻茭薪蒸穀菽泉帛弓刀甲楯車船人
徒動以萬計辰索暮辦調遣彌縫不使一間語師
既東身獨留張杜要害使去者無却顧憂取日虞
淵功最右席邁常恨世徒知忠穆復辟之
功爲大而周公首倡大義則少有能言者

宋秘閣修撰趙鞏墓

咸淳臨安志在徐范村之間

武林紀事鞏字子固錢塘人登乾道進士嘗使金
問曰皇帝清問下民賦非汝作乎歎服之從遊者

甚衆號西林先生時禁僞學以
秘閣修撰知揚州編入黨籍

明兵部尚書諡端敏胡世寧墓

萬曆杭州府志在

五雲山嘉靖十年諭葬

獻徵錄胡端敏公世寧正德中由刑部陞廣西太平

府知府尋遷江西憲副時宸濠謀不軌吏江西者
勢怵利啗惟其欲是聽間有稍知順逆者不過循
默自保孰有奮不顧身如胡公者哉疏朝入而禍
夕發竟以脫身間走得免灰滅及械擊掖庭備嘗
百毒朝之用事者悉受濠賂幾陷不測矣賴御史
徐文華申救減死得戍遼東躬履行間授徒以自
業嗣濠誅起官累仕至兵部尚書太子太保公幼
極艱苦寄食就學卓有經濟之志仕幾四十年雖
祿一品被服飲食猶素士云

明順天府尹查秉彝墓

萬曆杭州府志在五雲山

桐樹塢嘉靖四十年諭葬

明詩綜傳秉彞字性甫海寧人嘉靖戊戌進士

除推官歷官

順天府尹

明長史俞起蛟墓

杭州府志在雁亭鄉

明浙江都指揮僉事王佐墓

在定山

趙寬昭武將軍浙江都指

揮僉事王公墓誌公姓王諱佐字廷輔永平之遷安人世習武公以俊秀充武學生後領父職弘治改元兵部奏授都指揮僉事赴兩浙備倭在浙土凡十年以久涉風濤感疾而逝時弘治十年也遺命葬錢塘以弘治已未葬於定山之原

吳越給事羅隱墓

夢梁錄在定山鄉

詳名賢

謹按研北雜誌云謝皇甫嘗至新城故老言羅隱給事冢在縣徐村之水塢冢碣猶存梁開平四年

沈崧志又紹興府志云隱寓居蕭山卒墓在許賢鄉明一統志云隱墓在涇縣東七十里江西通志云羅隱墳在樂安縣羅家潭其說不同未知孰是今仍舊志存以俟考

宋鄜王謚武僖劉光世墓

咸淳臨安志在定山北

鄉萬曆杭州府志光世保定軍人高宗時授耀州觀察使屢戰勝金為中興良將嘗仕浙西安撫大使累官安國公陝西宣撫使贈太師謚武僖追封鄜王無名氏題劉公墓詩將軍力盡馬蹄穿一片丹心萬古傳叱咤風雲起平地扶持日月麗中天寶刀掛壁血猶在丹詔褒功墨尚鮮到底英雄身不死旌忠長倚碧雲邊

西湖志卷之二十五

西湖志卷之二十六

冢墓二

北山路

宋杜子恭墓

夢梁錄在錢塘

宋書自敘錢唐人杜子恭通靈有道術明

一統志孔稚圭東過錢

塘北郭於舟中遙拜之

謹按南齊書孔稚圭本傳云稚圭父靈產太始中罷晉安太守有隱遯之懷過錢塘北郭輒於舟中遙拜杜子恭墓此蓋於稚圭傳中追敘其父靈產事非稚圭也

元國子監丞陳旅墓

萬曆杭州府志在西湖北太

學山

詳名賢

元鄭光祖墓

錢塘志補葬靈芝寺

詳名賢

宋尉曹將金勝祝威墓

成化杭州府志在雲陽洞

右

西湖遊覽志宋建炎三年完顏宗弼至臨安郡守康允之退保赭山錢塘令朱蹕鳩鄉兵二千

邀擊之力戰死尉將金勝祝威復集凋兵據葛嶺編竹覆泥爲大途以誘之羣騎颺至蹶踈而踣仆者鱗疊遂大駭遁赤山得奸細爲導由南壁入勝威被執死之郡人感其忠節駢葬雲陽洞之右

明禮部主事王洪墓

成化杭州府志在尉司下扇

胡儼王希範墓誌希範諱洪曾祖德甫祖善父輝世居錢塘舉進士任行人將命關陝得使職人賢之歷陞侍講遷禮部主事享年四十有二希範之學渟蓄深博期至於古人而不假之年其命也夫

明許昭遠墓

錢塘縣志在下扇一畝許昭遠與妻

盧氏並至孝人稱為雙孝墓云

明沈禮墓

在金固山

宋濂錢塘沈君墓誌君諱禮字仲和錢塘其所居素善書

廣致奇異之書列度左右晝夜研索期不愧於古人行一善則喜否則若不能自容是非儒者之行耶卒以洪武九年墓在錢塘城西之金固山

宋資政殿學士謚莊敏章墓

武林舊事在寶石

山

萬曆杭州府志案建州浦城人歷官同知樞密院事立邊功為西方最授資政殿學士中太乙

宮使未幾卒賜卹甚厚命其壻劉何使兩浙供葬事贈太師謚莊敏

元貞白先生吾邱衍遺文冢

武林紀事吾子行先

生衍死於水骨朽淵泥西湖多寶院僧可權葬其

遺文於後山與其師骨塔相對乞銘於胡汲仲銘

曰生弗瀆死弗辱貞哉白貞白乃先生之號也詳名

賢凌雲翰悼吾子行先生詩布衣吾道士舉世莫能借遽作騎鯨客空遺夢蝶齋陽冰書瘦硬方朔語詼諧墓碣名貞白臨文每愴懷

宋邳王墓

咸淳臨安志在瑪瑙山

武林舊事寶雲觀邳王攢所

宋兗王墓

咸淳臨安志福教院王子兗王攢所

宋恭孝儀王仲湜墓

咸化杭州府志在顯明寺

咸淳

臨安志顯明院舊名興福保清大中祥符元年改今額紹興初為太傅儀王湜攢所西湖遊覽志仲湜當靖康時徽欽北駕六軍欲擁而立之王不從及高宗即位於應天王薨關詣行在命為濮王後

薨葬於此南宋遺事
在北山虎頭巖下

宋施岳墓

古今碑目在虎頭巖

武林舊事岳字仲山號梅川吳人能

詞精於律呂楊守齋植梅作亭以葬薛夢桂撰墓誌

宋貴妃茅氏攢所

咸淳臨安志在茅寺

宋潤國公主攢所

咸淳臨安志在開元寺

宋秦國夫人毛氏墓

西湖遊覽志在嘉德永壽講

寺宋理宗時秦國夫人毛氏者皇后母也既老結

菴於此後遂葬焉

宋沖善廣王墓

咸淳臨安志在上智果院景定四

年充皇孫鎮安寧武軍節度使開府儀同三司

宋梁廣王墓

咸淳臨安志在中子峰

武林舊事上智果院有梁

廣王攢所

宋叅知政事陳文龍墓

萬曆杭州府志在智果寺

旁葬之次日即生竹竹俱有刺人不能登衆謂忠

義所感

堯山堂外紀景炎初興化軍降元陳文龍被執至合沙以詩寄仲子訣別云斗壘孤

危弱不支書生守志誓難移自經溝瀆非吾事臣

死疆場是此時須信纍臣堪繫鼓未聞烈士樹降

旗一門百指淪胥此

惟有丹衷天地知

宋花翁孫惟信墓

夢梁錄在水仙廟側

詳名賢劉克莊孫花

翁墓誌銘季蕃客死錢塘妻子兄弟皆前卒故人
立齋杜公節齋趙公與江湖士友葬之西湖北山
水仙王廟之側季蕃孫氏名惟信季蕃字也貫開
封祖父皆武爵季蕃少受祖澤調監嘗不樂棄去
始婚於婺後去婺留杭最久其言以家爲繫縲一
身之外無他求一榻之外無長物無乞米之帖無
逐貧之賦終其身如此自號花翁名重江浙公卿
間非山水風月一不掛口長身縕袍意度疎曠見
者疑爲俠客異人尤重氣義嘗客孟良甫方孚若
家孟死猶拳拳其子孫孚若葬徒步赴之淳祐三
年九月卒葬以其年臘月杜公輔臣趙公大京兆
也季蕃一布衣以死託二公卒賴二公以葬且築
室買田祠焉天下兩賢之季蕃長於詩水心葉公
所謂千家錦機一手織萬古戰場兩鋒直者也中
遭詩禁專以樂府行余每規季蕃曰王介甫惜柳
耆卿繆用其心孫莘老譏少游放潑得無似之乎
季蕃笑曰彼踐實境吾特寓言耳然則以詩沒節
非知季蕃者以詞沒詩其知季蕃也愈淺矣銘曰

昔眉山公欲以和靖配水仙王其論已定余評李
蕃和靖之亞儻分半席無不可者伯鸞要離異世
同調曷不儕君偕侑新廟仇遠花翁墓詩水仙分
地葬詩人一片荒山野火焚薦菊有亭今作圃掃
松無子漫留墳蝸牛負殼粘碑石老鶴攜雛
入壠雲欲把管絃歌楚些却憐度曲不如君

晉抱朴子葛洪墓

萬曆杭州府志在葛嶺寶雲寺

詳方外吳萊登初陽臺謁抱朴子墓詩人生擾擾
間頗覺天地窄我憶抱朴子高堂睨空碧初陽出
山上照破萬古石丹光動鼎鑪霧氣浮冠舄遺書
上下卷道妙或黃白老衰及病瘦辛苦爲形役豈
伊鳳鸞姿終以狐兔宅尸解本無形空飛寧復迹
鄭君曾有傳勾漏恍所歷降子尚可問稚川特未
隔幽林來魍魎缺井守蜥蜴神仙果何人海岳長
獻劇世傳老聃死吾謂方朔謫虛墳誰所爲恠樹
獨悲激滿前湖與山秋色落几席因茲些爾魂目
送天邊翻薩天錫謁抱朴子墓詩煉丹仙子渺茫

間一夕乘風去不還火冷爐頭灰已燼雲封洞口
嶺長閒千年瑞氣生瑤草夜半天風響珮環真境
空明自今古烟塵依舊隔瀛寰

宋上官良史墓

萬曆杭州府志在北山招賢寺後

武林舊事良史字季長號淇園

宋趙師秀墓

夢梁錄在葛嶺

詳名賢劉克莊弔趙紫芝墓詩蔓草縈荒

嶺經過亦可悲世間空有集天下豈無詩盡出香
分妓惟留硯付兒傷心湖上塚誰復與刊碑薛師
石拜紫芝墓詩辛未聯詩別九載成恍惚大星墜
地旋無光君身入土名不沒吳越之水相交流寂
寞詩魂何處遊不聞孤鶴喚人醒空見梅花似人
影無復東巖招謝客應往西湖傍和靖世上如今
一句無一靈獨存勢欲孤我有生芻束未得只愁
宿草易荒蕪徐集孫拜紫芝墓詩晚唐吟派續於

誰一派纔昌復已而對月難招青塚魄見梅如挹
紫芝眉四靈人物嗟寥落千古風騷憶俊奇公去
遙遙誰可法少陵終古是吾師

宋謚忠宣洪皓墓

建炎以來朝野雜記在葛嶺

元太史楊瑀墓

錢塘志補在葛嶺

詳名賢

宋德國公主攢所

咸淳臨安志在報恩院

宋婉儀魏氏攢所

咸淳臨安志在喜鵲寺

宋輔文侯牛皐墓

名勝志在栖霞嶺劒門關

王惟儉宋

史記皐字伯遠汝州魯人金入侵皐戰屢勝補保義郎再攻京西皐十餘戰皆捷辟為同統制兼京西南路提點刑獄尋改神武後軍中部統領僞齊合寇岳飛遣皐行裏三日糧未盡城已拔敵攻淮

西飛遣臯渡江自提兵與臯會臯追擊之軍聲大震除武秦軍承宣使尋充河北京西撫司左軍統制加龍神衛四廂都指揮使成德軍承宣使紹興十七年上巳日都統制田師中大會諸將臯遇毒亟歸語所親曰臯年六十一官至侍從所恨南北通和不以馬革裹屍耳明日卒或言秦檜使師中毒臯云

元漂陽州學正仇遠墓

萬曆杭州府志在棲霞嶺

詳名賢錢惟善拜仇處士墓詩詩窮八十年江海正淒然玉塵風生頰青山雪滿顛門墻張籍俊墓表孟郊賢出處人皆識哀歌徹九泉張翥謁仇仁近墓詩前輩凋零盡南陽有古阡詩應傳四海酒不到重泉槐國真成夢桃園亦是仙松根一掬淚慘淡墮風煙凌雲翰謁仇山村墓追和張仲舉詩韻并序洪武戊午清明恭謁栖霞先壠與南陽仇先生墓相鄰因酌焉偶閱張仲舉集有拜栖霞仇

先生墓絕句云淚灑荒苔積草中更無人跡紙煙
空墳前惟有山茶樹開到清明自落紅因追和其
韻敬弔先生落照中紙煙銷盡酒罇空
牛羊上壠無人管無數山花遠近紅

元左司員外郎張昱墓

萬曆杭州府志在棲霞嶺

詳名賢七修類稿光弼號一笑居士嘗曰吾死埋
骨西湖題曰詩人張員外某之墓足矣其後果如
所言

宋少保鄂王謚忠武岳飛墓

夢梁錄在棲霞嶺下

子雲祔

萬曆杭州府志初飛潛瘞九曲叢祠孝宗
時改葬是處墓木皆南向景泰間同知馬

偉脩葺取檜析幹為二植墓前名分屍檜正德八
年都指揮李隆鑄檜與檜妻王氏万俟卨三像跪
墓前嘉靖十四年巡按御史張景刻盡忠報國四
大字於石樹墓之南南宋相眼詔臨安府訪求岳

將軍屍其墳在錢塘門外當時私號賈宜人墳輟
耕錄岳武穆王墓自國初以來墳漸傾圯江州岳
氏諱士迪者與宜興州岳氏合力起廢久之廟與
寺無寸椽片瓦李君全爲杭總管府經歷慨然以
爲己任而鄭君明德爲作疏請褒忠義在天之靈
激生死爲臣之勸疏成郡人王華父一力興建趙
公子期在禮部倡議奏聞降命勅封名人多有詩
弔之趙孟頫岳鄂王墓詩岳王墳上草離離秋日
荒涼石獸危南渡君臣輕社稷中原父老望旌旗
英雄已死嗟何及天下中分遂不支莫向西湖歌
此曲水光山色不勝悲潘子素岳王墓詩湖水春
來自綠波空林人跡少經過夜寒石馬嘶風雨日
落山精泣薜蘿江左長城眞自壞鄴中明月竟誰
歌惟餘滿地萑弘血草色年年碧更多凌雲翰岳
鄂王墓詩前相汪黃後相秦力圖恢復竟何人朱
仙路近旌旗晚古汴城高草木春江月照空埋劍
獄邊沙遮斷屬車塵栖霞嶺下將軍塚夜夜悲風
起石麟朱彝尊岳鄂王墓詩宋室偏安日眞忘帝

業艱但愁諸將在不計兩宮還鄂國英雄士淮陰
伯仲間策名先步曲薄伐自江關赤縣期全復黃
河度幾灣龍廷生馬角雪窖視刀鏐城下盟何急
師中詔已頒盈庭尊獄吏囊木謝朝班相狡妻兼
煽和成主愈孱長城隳道濟大勇器成觀舊井銀
餅失高墳石虎閒銘功存版碣鑄像列神奸曠世
心猶感經過淚獨潛傳聞從父老流恨滿湖山北
狩終難返南枝尚可攀墓門人寂寞江樹烏緡蠻
宿草經時綠秋花滿目斑
依然潭水月終古照潺湲

國朝雍正九年知錢塘縣事李惺重鑄秦檜與妻王氏

黨張俊万俟卨跪墓前

李惺鐵人銘鐵產於山等也何獨採而鑄此然則鐵

之污亦大不幸也夫

宋尚書員外郎董京墓

成化杭州府志在棲霞嶺

掃帚塢子樞密院都承旨必先祔

元醫學提舉倪居敬墓

在掃帚塢

徐一夔元保冲大夫江浙官醫

提舉倪公墓誌公諱居敬字行簡杭州人遇異人授秘方至正中授醫學教授天兵下吳門徵至軍前療疾無弗愈洪武四年卒葬棲霞嶺掃帚塢

元湛淵先生白珽墓

武林紀事在棲霞嶺

詳名賢宋濂元

湛淵先生白公墓誌銘湛淵先生白公諱珽字廷玉家錢塘由太平路儒學正尋遷從事郎婺州路蘭谿州判官不復有宦情居西湖以湛淵自號天曆元年九月十五日卒年八十一葬錢塘縣履泰鄉棲霞山之陽其子遵治命題曰西湖詩人白君之墓銘曰虎林有哲夫秉德良優柔嗜義如嗜利避名如避仇指退以為進謙抑以自修知分中自定不假外物求天經况所惇血淚交頤流冠冕百

行先倫品庶不偷發越見聲詩笙鏞間鳴球律呂
素和協八音交相繆雄章落四海虹氣日夜浮栖
霞有名山草木光如油紀
德薦石章千古振諸幽

元丞相瑣柱墓

舊浙江通志在岳墓之東今有碑

表

宋烈文侯張憲墓

成化杭州府志在東山衙口元

總管夏思忠為立表識

武林紀事宋岳雲張憲被秦檜誣害鄉人痛其死為

之立祠祀為土神雲墓在武穆王塋域之內憲墳在岳墳西一里唐家巷側年遠為土人占業止遺一邱淪於叢莽士人王天祐偶見此邱前有碣篆書題曰張烈文侯墓驚曰舊聞烈文侯有墓不意在此歸即具言於當道時巡按張公縉遂拉同官相厥地修築塋域仍樹碣於墓前以識舊也予目

睹盛美作詩弔之曰將軍墳墓久淒涼一段精忠
伴夕陽寂寂松篁鎖煙霧離離禾黍散牛羊遭逢
盛世褒忠烈整頓荒邱待表彰料得英靈終不泯
千秋猶自鎮錢塘後并侯廟亦新之時正德十四
年也

國朝烈女孫秀姑墓

錢塘縣志在東山街

馮景孫秀姑傳

孫氏錢塘人楊鼎元聘為其子文龍婦父母亡歸
楊待年鼎元父子賈浙東秀姑依姑居與閭士積
鄰士積嘗穿壁窺秀姑日與羣嬖敲壁噪呼辱之
秀姑慟哭曰我尚可活耶俟姑寢秀姑篝燈縫衣
裳上下聯綴飲鹽汁而死
大中丞張敏疏請建坊

明湖廣按察使僉事楊祐墓

錢塘縣志在青芝塢

子承憲祔

兩浙名賢錄祐字汝承錢塘人嘉靖己丑進士選庶吉士出為湖廣興國州知

州尋轉濟南府同知為政廉平民歌思之陞
江西僉事調湖廣僉事興利舉廢多善政

明舉人汪渢墓

錢塘縣志在青芝塢詳名賢

國朝御史趙蒼璧墓

錢塘縣志在青芝塢

明陝西叅政錢鉞墓

杭州府志在佛牙塢河南通志鉞字

大用仁和人成化中知汝寧府持身清謹律例
精明郡中熙然稱治在任九年陞陝西叅政

宋御史毛子俊墓

錢塘縣志在西山玉泉舊浙江通志子

俊汴人扈宋高宗蹕南來忠義慷慨嘗
上書言事與秦檜忤罷官沒葬於此

宋學士柴士宗墓

杭州府志在玉泉寺西北錢塘縣志

士宗本汴人宋高宗建炎年間兄弟二人扈蹕南
渡一為學士一為校尉士宗卜居於杭卒葬玉泉

為武林柴氏之始祖五百
餘年子孫繁衍稱為名家

元處士鄭德峻墓

古今碑目在西湖玉泉山碧梧

原左丞周伯琦題曰有元竹隱鄭處士墓

明副都御史錢宏墓

錢塘縣志在玉泉寺右

童承敘錢

公神道碑公諱宏字可容別號江樓正德戊辰進士試銓部政尋遷刑部廣東司員外執法明允轉山東按察司副使勞績最著民間公名輒曰錢使君青天也擢至都察院副都御史年六十有一其先本汴人扈宋徙錢塘公後葬於玉泉山祖兆之左有司所營葬也

明刑部員外郎邵經邦墓

杭州府志在玉泉山

舊浙

江通志字仲德庚辰進士時永嘉張璁與經邦同籍相得甚懽大禮議起經邦以工部改刑部主事

署員外郎世宗以陸燦言勒張璫歸桂萼致仕不數月手詔追還逮燦下獄經邦欲進言未有間會十月朔日有食之乃奏璫不宜召還議禮諸臣不宜寵任太過且引皇父之詩以爲喻大畧謂議禮與政不同禮在人心所向不一故可排衆論任獨見若夫朝廷之政苟非開誠布公集思廣益不可一日行也陛下即能移此議禮諸臣亦安能掩天下萬世耳目服愚夫愚婦之心耶疏入世宗震怒廷杖幾斃禍且不測會乾寧東七所災得減死謫戍鎮海衛歷三十四年卒於戍所先是經邦爲工部主事不肯附麗權貴在戍時潛心經史著有三弘集學者謚爲弘毅先生

明許斌墓

錢塘縣志在玉泉山老人洞俗名鍋子

山村子廣東道御史賢祔

國朝贈按察使僉事高咸臨墓

在玉泉山

錢塘縣志咸臨字與

侯順治乙酉貢生任福建永安令賊犯
永安城陷不屈死之事聞贈官蔭子

五節婦墓

舊浙江通志在西山玉泉傍錢塘毛氏

五節也陳氏許氏童氏孫氏查氏一門四世而苦

貞完節者繼踵人皆稱毛氏之家風

宋貴妃李氏陳氏攢所

咸淳臨安志在慈聖院

建炎

以來朝野雜記淑妃李氏孝宗後宮也初為典字
淳熙三年冬轉通義郡夫人七年冬為婕妤明年
秋卒贈貴妃時李壽在經筵因夜直嘗諫以後宮
多妄費上曰安得此聲近惟葬李妃用三萬緡耳
淑妃陳氏初封新平郡夫人淳熙十二年冬
進美人十八年冬進婉容紹興元年拜為妃

宋永王祁王墓

咸淳臨安志在放馬場壽聖崇寧

功德院紹定三年改充皇子永王祁王攢所

宋直秘閣提刑周格墓

夢梁錄在獨角門步司前

軍寨前

咸淳臨安志格處州人直秘閣浙江提刑建炎元年討叛卒陳通與子肇丕俱遇害

高宗嘉其死節贈官敕葬其子祔焉

唐處士姚澣墓

古今碑目在西山澣吳興人唐大

中八年九月二十四日葬

國朝戶部侍郎嚴沆墓

杭州府志在西山

李霽嚴公墓誌公字

子餐順治乙未進士累官至總督倉場戶部侍郎

國朝少詹事邵遠平墓

錢塘縣志在雷院遠平號戒

山康熙甲辰進士舉博學宏詞歷陞少詹事

宋濟王竑墓

建炎以來朝野雜記在駝巘嶺下

武林

舊事竑寧宗長子也先是寧宗得太祖十世孫昀以嗣沂王濟王與史彌遠有隙彌遠日媒孽於寧宗濟王出居湖州太湖賊劫濟王謀立之不從率州兵擊賊變聞彌遠稱詔殺濟王人多冤之尋乃見崇詔復王爵景定五年敕葬於駝巘嶺

宋都官員外郎元奉宗墓

在駝巘嶺

范仲淹都官員外郎元公

墓誌公諱奉宗字知禮其先臨川危氏也王考德昭為吳越王相賜姓元氏景德中公中甲科歷仕尚書屯田員外郎公思事松楸願得餘杭監郡詔從其請進都官員外郎景祐戊寅考終永定里享年七十八葬於錢塘履孝鄉駝巘嶺之先塋

宋太子少保謚章簡元絳墓

在駝巘嶺

蘇頌太子少保元章

簡公神道碑公諱絳字厚之錢塘人其先本危氏著姓臨川郡之南城縣後遷錢塘公由進士出仕熙寧八年拜叅知政事卒贈太子少師按公生大中祥符己酉終元豐甲子以天聖丁卯登仕以元豐辛酉納掾起州縣歷中外華要而至丞弼自著作佐郎十三遷至尚書工部侍郎五易封爵至魏郡公凡九鎮藩郡而兼一路安撫鈐轄者四六經使任而江西河北皆再至八朝典領臺閣諸宮觀更踐省府總十一職以二品致政壽七十六在仕五十八年世鮮其比葬於杭州錢塘縣西山其墓去祖塋幾里許夫人太原王氏蜀郡王氏並祔

謹按夢梁錄都尉周仰待制周邦彥少師元絳三墓并在南蕩山今考諸山無南蕩之名因元絳碑有去祖塋幾里之文故以元絳墓次元奉宗後并二周墓亦附見焉

王氏世墓

在駝巘嶺

宋濂孝思菴記錢塘王驥晉丞相導後其裔孫耕以文行

稱周乾化中仕吳越官烏程倅烏程之弟畎遂居虎林山中實驥之五代祖驥之祖名暹字子愚錫號為明誼處士嘗圖地於西湖北山之間曰駝巘嶺有三奇石恠松根蟠其上預為壽藏且曰此新兆也吾敢居其首乎南山梯子嶺先世數大墓存焉年遠不敢遷倣古者葬衣冠之義斲木為主書吾父名葬其中他日吾則祔其傍菴廬三楹顏之曰孝思示後世不忘其先也

明清江知縣沈儀墓

錢塘縣志在桃源嶺

分省人物考儀

字茂德仁和人銳子正德舉於鄉授清江縣陞惠州府通判投効歸端居靜養若孤鶴高騫有翩然致之

國朝處士陳廷會墓

杭州府志在桃源嶺

馬三寶墓

夢梁錄在行春橋水竹塢教場內

錢塘縣志

按成化郡志墓在九里松行春橋水竹塢宋紹興末欲去之以廣教場方舉鍾有黑蜂數百出墓中不可近是夜帥夢一戕冠朱衣者告曰吾錢王之子葬此已久祈勿毀遂輟役至元十五年軍廝名狗兒者掘發之得鐵券一題曰雁門馬氏葬橫衝橋至元十五六狗兒壞我屋其定數如此夫鐵券所云馬氏似與俗呼馬三寶相符而又謂之錢王子何也世代漸遠無從質訂存以俟考

宋貴妃慕容氏攢所

咸淳臨安志在資德院

建炎以來

朝野雜記慕容氏哲宗後宮也崇寧元年封才人大觀二年進美人靖康之難六宮皆北去惟先朝嬪御得免乃建承慶院以處之紹興十四年冬拜賢妃年八十贈貴妃

宋貴妃張氏攢所

咸淳臨安志在永寧崇福院

宋史

后妃傳張氏開封祥符人初入宮封永嘉郡夫人
乾道六年進婉容淳熙七年封太上皇淑妃十六
年進貴妃

宋杜汝能墓

咸淳臨安志在麴院

武林舊事汝能字叔謙太后諸

孫居麴院能詩有聲

明吏部侍郎茅瓚墓

杭州府志在盤龍山

詳名賢

宋通問副使直秘閣朱弁墓

在九里松

詳名賢西湖遊覽志

弁徽州人紹興初授官副王倫使金見執附表云節上之旄落盡口中之舌猶存歎馬角之未生魂飛雪窖攀龍髯而莫逮淚灑冰天高宗覽之流涕後歸卒葬於此錢塘縣志弁卒於臨安稽留山後四十年從孫熹官浙中卜葬於積善峯下

明叅議黃汝亨墓

舊浙江通志在花園橋下

詳名賢

元處士周天祐墓

在茅家埠

貝瓊貞孝處士周公墓誌公諱天祐字思

順其先汴人五世祖燧宋機察官扈從高宗南渡占籍於杭公好學讀書受易於吳興宇文子貞居家以孝聞監察御史李完者薦授嘉興路崇德州倅不赴洪武四年葬茅家埠祖塋之側

明太僕寺少卿吳謙墓

萬曆杭州府志在茅家埠

成化二十三年諭葬

明兵部侍郎陳禹謨墓

錢塘縣志在茅家埠天啓

間諭葬

分省人物考禹謨號心抑仁和人萬曆丁丑進士授中書選御史尋除江西巡按所

至簡肅終養里居十年起補巡漕陞太僕卿撫鄖陽轉刑部侍郎終於官

明禮部侍郎蔣驥墓

萬曆杭州府志在尉司里仙

芝山

楊榮蔣良夫墓表良夫諱驥世為錢塘人登洪武庚辰進士擢行人嘗奉命使郡國所至

皆仰風采永樂初陞翰林院檢討自是得盡閱古今之書未幾為人所連逮繫獄十有餘年處之怡然洪熙改元得釋陞左春坊又陞翰林院侍講進侍講學士尋拜禮部右侍郎命下之日士林稱慶遂以疾卒遣官諭祭詔有司治墳塋

明山西按察使僉事王琦墓

成化杭州府志在仙

芝嶺

鄭厚僉事王公墓表公諱琦字文璉永樂甲午領鄉薦會試中乙榜授汝州學正拜河南

道監察御史陞山西按察司僉事提學晉陽士風為之不變越二年改四川尋致仕晚年閉門自號百拙居士不營生產歲祲無以朝夕竟以是卒合郡士大夫咸痛惜之為之禮而葬焉

明贈尚書江曉墓

萬曆杭州府志在仙芝嶺

呂本江公

神道碑公諱曉字景熙別號瑞石正德戊辰中會試第四人除兵部武選司主事歷官工部右侍郎年七十有二穆宗即位用臺諫言贈尚書祭葬悉如制

明侍郎江鐸墓

舊浙江通志在仙芝嶺萬曆二十

三年諭葬

宋貴妃閻氏攢所

咸淳臨安志在顯慈集慶寺

明都督張奎墓

萬曆杭州府志在飛來峰石人塢

明都督牛桓墓

錢塘縣志在靈鷲山

宋諫議大夫楊大雅墓

在靈隱山

歐陽脩諫議大夫楊公墓誌公

諱大雅字子正杭州錢塘人以諫議大夫集賢院學士出知亳州封號畧縣男食邑三百戶卒年六

十九有西垣集以景祐二年與漳南縣君合葬

謹按楊大雅初配漳南縣君張氏繼配即廣平郡太君張氏歐公於大雅誌中不詳葬所第云葬杭州某鄉而廣平誌中則云葬於靈隱山祖塋則此墓當在一處也

宋廣平郡太君張氏墓

在靈隱山

歐陽修廣平郡太君張氏墓誌

楊公大雅以文行知名號有清節夫人張氏佐公以勤儉治家教子弟和宗族皆有法至和二年卒於高郵以嘉祐元年葬於杭州錢塘縣履泰鄉西村靈隱山祖塋之西

宋直秘閣錢龢墓

武林紀事在靈隱天竺兩山之

間

詳名賢

宋翰林唐詢墓

在靈隱山

詳名賢祠堂記沈遼翰林唐公

仁宗朝為御史歷蘇杭青三州愛錢塘之靈隱以為山水為天下第一而公之幽宮乃卜於寶峰葬後三年仲子垌為作堂於寺之西軒以申公志

宋沖晦先生徐奭墓

古杭雜記在靈隱山石筍院

詳名賢

明岫嶠山人李元昭墓

西湖遊覽志靈隱寺旁岫

嶠山房故將軍李元昭隱居也年八十五預示逝

期乃葬焉

詳名賢

宋郭時義墓

錢塘縣志在靈隱山宋建炎間時義

母馮氏醫孟太后疾愈封國安夫人賜姓趙併墳

山

明驃騎將軍嚴德墓

萬曆杭州府志在靈隱寺西

西湖遊覽志將軍名德太平當塗人從明太祖討張士誠有功遂令守禦杭州會天台賊反德往討之中流矢卒上悼之贈驃騎上將軍追封天水郡公勅有司治葬於此

明僉都御史張濂墓

舊浙江通志在靈鷲山錢塘

縣志父贈吏部稽勲司員外郎應楨及弟光祿寺署丞江俱葬此

明高士邵穆生墓

在靈鷲山

詳名賢黃汝亨高士邵虎菴塔銘先生諱

穆生別號虎菴弘齋公諱經邦仲子年三十餘即
屏居靈鷲山之呼猿洞卒即葬於山廬之側冢上
置塔塔覆以亭

明行人陸培墓

舊浙江通志在靈鷲山

詳名賢

明知通州諸夢環墓

錢塘縣志在靈隱山

舊浙江通志夢

環字宇懷登進士出守通州恤刑薄斂有古循吏風

明光祿寺卿諸允修墓

舊浙江通志在靈鷲山

國朝文華殿大學士謚文僖黃機墓

錢塘縣志在靈

鷲山機字次辰順治丁亥進士授編脩積官文華

殿大學士兼吏部尚書年七十五卒

國朝兵部侍郎項景襄墓

錢塘縣志在靈隱山

舊浙江通

志景襄字去浮號眉山順治壬辰成進士乙未廷對補檢討歷官兵部右侍郎卒於官

明太子太保經畧宋應昌墓

舊浙江通志在北高

峰下子守敬爾祁祔

明知代州贈吏部尚書黃思道子叅政贈吏部尚書

克讓墓

杭州府志俱在北高峰下

舊浙江通志思道號默菴

錢塘人萬曆庚午舉人除知代州崇學寬刑稱循良歿之日殮猶不給郡人悲號罷市贈中憲大夫

廣東右叅議今追贈奉政大夫吏部尚書克讓字含光萬曆甲午舉人戊戌進士官工部都水使權

荆州尋擢廣東叅政

吳越國順睦妃孫氏墓

〔夢梁錄〕在石人嶺下

〔錢塘志補〕

忠懿王妃孫氏名太真錢塘人泰寧節度使承祐之姊也少事忠懿王甚謹一以儉約為訓漢制拜夫人周勅封吳越王賢德夫人宋開寶五年進封賢德順睦夫人九年王與妃及世子惟濬入覲加封吳越國王妃是歲歸國薨葬石人嶺

明禮部員外郎程文墓

〔萬曆杭州府志〕在石人嶺

下文徽州人屢官翰林院編修有文集行於世

明布政使夏時墓

〔成化杭州府志〕在石人嶺

〔詳名賢〕

唐許玫許現墓

〔萬曆杭州府志〕睢陽太守許遠之

二子玫現葬錢塘縣天竺莊雞籠墩

吳越國孝獻世子墓

咸淳臨安志在天竺前山

吳越

備史名弘傳文穆王第五子立為世子卒年十六謚曰孝獻

宋憲聖吳太后攢所

西湖遊覽志在石人嶺下時

思薦福寺為高宗吳太后葬所墓前有二石馬琢刻如生舊傳夜輒馳驟鞦轡光瑩如玉至今苔蘚不侵

明工部侍郎嚴時泰墓

在上天竺

尤侗武林嚴氏墓道記時泰正

德辛未進士由縣令歷永昌太守四川布政陞巡撫有征蠻功進工部侍郎葬於上天竺東偏子之清世襲錦衣千戶祔

明都督僉事許亨墓

錢塘縣志在天竺後山

楊榮許公

墓誌公諱亨鎮浙江都司二十餘年其沒軍士咸奔送其喪去今四十年矣人猶思之不忘庶吉士山陰秦瑛挽之詩曰門外日高閒劒戟海濱風靜利漁樵又曰累朝功業黃金重一寸忠勤雪髮添皆實錄也

明都督萬表墓

杭州府志在月桂峰歐家山

錢謙益萬

公傳公諱表字民望鄞縣人正德庚辰中武進士以都指揮起家為漕運叅將者二漕鎮總兵掛印者二以都督同知僉書南京中軍都督府公於漕政兵事無不洞悉所至皆建監甲寅海上倭亂散家財募死士奮欲死之僉書南府道經姑蘇與倭遇婁門楊涇橋率所募及少林僧邀擊身中流矢遺書於子曰我家世以戰功死王事我身不任兵晚年添一箭瘢不亦美乎公少嗜元學已而精閱

內典披衲入伏牛山曉行見日升忽大悟歷官四十年家無餘財餅鉢蕭疎與野衲雜處嘉靖中王汝中羅達夫唐應德以理學名於時公與之頡頏自號鹿園居士

元編修楊載墓

武林紀事葬錢塘

詳名賢

宋淳固先生宋斌墓

夢梁錄在資國寺右

萬曆杭州府志

斌字文叔袁州分宜人弱冠師晦菴先生受四書大義年八十私謚為淳固先生

西溪路

叅軍闕廷詔墓

杭州府志在秦亭山下

明長史裘自謙墓

錢塘縣志在碧峰山下仲子贈

奉政大夫之雄葬碧峰之右丹鳳山有丹山起鳳

坊

明沈棲霞墓

萬曆杭州府志在法華山

宋武義大夫畢進子節度使謚忠毅再遇墓

夢梁

錄並在西溪

宋史畢再遇傳進從岳飛轉戰江淮間積階至武義大夫再遇以恩補官

邊事起再遇以功第一累遷左饒衛上將軍和好成乞歸以武信軍節度使致仕年七十贈太師謚

忠毅

宋敷文閣待制柳約墓

在西溪

周必大左朝議大夫充敷文閣待制

致仕柳公約神道碑公諱約字元禮秀之華亭人考諱廷俊述古殿學士公登大觀三年上舍第深於經術大為學者宗宣和四年充編脩汴都志尋為徽州司錄改通判宿州七年拜監察御史靖康

初兼權殿中侍御史嘗論三鎮不可棄改尚書工部員外郎遷太常少卿除直龍圖閣知嚴州兼兩浙西路兵馬都監自是遂以忠勞召用未久而罷起知蔡州被命即行畧無顧避用郊恩次對敷文閣待制紹興十五年告老是年卒於家享年六十四遺命以述古葬臨安之西溪諸子遂以是年亦葬公西溪去先塋纔數里云

宋集英殿修撰曾炎墓

在西溪

樓鑰集英殿修撰致仕贈光祿大夫

曾公神道碑刑部侍郎炎字南仲裔出南豐曾氏隆興元年進士淳熙八年知江寧縣紹熙元年遷大理寺主簿二年除司農丞三年擢知温州築瑞安石崗及平陽斗門慶元三年召赴行在除尚書郎中四年總領淮西江東兵馬錢糧五年除直敷文閣福建路轉運副使嘉泰二年除起居舍人轉起居郎兼權刑部侍郎三年郊祀恩封曲阜縣開國男食邑三百戶嘉定元年被命守婺未幾改姑

孰二年宗祀禮成進封開國子加食邑二百戶四年致仕薨享年七十一以光祿大夫告第官其後葬於臨安府錢塘縣欽賢鄉西溪山先塋之次有覺菴集與邑政總類藏於家

宋贈少傅謚襄恪趙密墓 夢梁錄在西溪欽賢鄉

宋史本傳趙密字叔微太原人用材武授河北隊將戍燕累功至太尉拜開府儀同三司領殿前都指揮使上疏告老以萬壽觀奉朝請隆興二年進少傅和議成罷為醴泉使乾道初卒年七十一贈少傅

明吏部員外郎虞淳熙墓 在西溪 詳名賢黃汝亨稽勲德園虞公墓誌

墓誌虞公以萬曆癸巳去官歸錢塘隱南山回峰下天啓元年沒三年葬於西溪七十二賢峰下謹按舊浙江通志載淳熙墓在雷峰塔下據黃汝亨墓誌墓實在西溪其所居在雷峰也

明贈刑部尚書洪有恒墓

西溪梵隱志在西溪子

贈太子太保刑部尚書薪祔

明刑部尚書謚襄惠洪鐘墓

萬曆杭州府志在西

溪東穆塢

詳名賢王守仁謚襄惠兩峰洪公墓誌特進光祿大夫柱國太子太保刑部尚

書兼都察院左都御史致仕洪公以嘉靖二年薨年八十一天子遣官諭祭錫謚襄惠賜葬錢塘東穆塢之原娶鄭氏繼周氏徐氏又繼魏氏尚書文靖公之孫女公墓合魏夫人之兆

明中書洪澄墓

西溪梵隱志在西溪阮家山

葛寅亮中

書洪澄傳

澄字靜夫別號西溪太保鐘子也少擅

文譽中正德舉人官內閣制敕中書兼修玉牒歸築別業於孤山晚年徜徉湖上足跡不入城市以孫贍祖貴贈都察院右都御史

明推官洪吉臣墓

西溪梵隱志在橫山桐塢村

明祭酒馮夢禎墓

錢塘縣志在西溪梅塢詳名賢董斯張

弔馮開之殯宮詩

玉樹承無恙書來月甫更鶴傳

君子化鵬告主人

行夜壑誰移棹寒天獨斲楹西

州門下路一過一吞聲橋李距錢塘盈盈一水望

暫歸歸魄久短別別魂長談屑凋賓座歌塵冷妓

堂孤山新築墅

明月弔虛廊

明副都御史陳洪濛墓

錢塘縣志在荊山萬曆間

諭葬

余有丁陳公墓誌公諱洪濛字元卿自號抑菴舉進士尋擢江西按察副使乙丑入覲推

都察院右副都御史巡撫貴州兼督湖北川東軍務進階通議大夫

明太僕寺卿陳潛夫墓

杭州府志在荊山詳名賢

國朝漕運總督謚清獻徐旭齡墓

錢塘縣志在荆山

馮溥徐公神道碑公諱旭齡字元文自玉山占籍錢塘父諱一鴻授徒玉山戊子江右寇發出避賊遇害公匍匐千里尋屍山谷間遇虎不顧夢父示以死所且告以毛廿八者乃得遺骸啗指沁骨因負以歸一時傳為孝感成進士前後居銓部八年流弊一清授雲南道監察御史累遷都察院左僉都御史巡撫山東陞工部侍郎督漕事公至淮以籌三便釐三害等疏請行自是歲省軍民金錢數十萬秋淮揚徐大水以公請得蠲賑閱視下河及賑濟徐州兩歲中水陸往還以勞卒年五十六

國朝處士陳祚明墓

錢塘縣志在鮮于山

明都督陳九思墓

錢塘縣志在小和山森羅塢

國朝吏部尚書徐潮墓

錢塘縣志在小和山

湯右曾
冢宰徐

公墓誌公諱潮字青來號浩軒癸丑進士由庶吉士積官至吏部尚書卒年六十九葬小和山之原
塔附

孤山路

辟支塔

咸淳臨安志在孤山

晤恩禪師塔

咸淳臨安志在瑪瑙坡圓公孤山詩

有竹蔭高僧塔之句

詳方外

宋智圓和尚塔

成化杭州府志在瑪瑙院

詳方外

唐抱玉慧琳法師塔

在瑪瑙坡

靈隱寺志姓戈新安人卅齡受業靈

隱西峰金和尚唐大曆中住下竺郡守杜陟裴棠棣盧元輔白居易先後並禮遇之比諸簪組上流

辭學高等或號毗曇孔子或名勝力菩薩
於靈隱講訓生徒二十載太和六年示寂

南山路

元中峰和尚舍利髮塔

〔成化杭州府志〕在雲居菴

吳越永明禪師塔

〔宗鏡錄傳〕在慧日峰

〔詳方外〕

國朝雍正十一年奉

旨重修立牌坊上刻

敕封妙圓正修智覺禪師之塔

元必才禪師塔

在南山演福寺

〔宋〕濂佛鑑圓照論
師大用才公行業

〔碑〕師諱必才字大用姓屈氏台之臨海人以至正
十九年滅度於南山演福教寺建塔寺之南偏奉

舍利
藏焉

明可授禪師塔

在南屏山

宋濂淨慈第七十六代住持無旨禪師授公碑

公諱可授無旨其字也一號休菴台之臨海李氏子洪武六年住杭之中天竺寺居二載退歸卧竹院而寂世壽六十九僧臘五十以遺骸歸龍塔而葬焉

明濟慧禪師戒公塔

成化杭州府志在虎跑寺大

理寺少卿楊復撰銘

宋贊寧禪師塔

靈隱寺志在龍井

詳方外

宋辨才法師塔

咸淳臨安志在龍井蘇頲濱為塔

碑

詳方外蘇軾辨才塔銘如來昔在世心禪語為教譬如四大海惟是一濕性性於濕性中變化

千萬億風來爲瀾濤風去爲湛然魚龍所遊戲鬼神所出沒船筏借其力網罟取其利其上爲洲渚諸國所生育其下爲淵谷百恠所藏伏東西出日月上下屬河漢觀者不能了聘昭何暇說如來知迷悶隨變爲解釋因變所說者是則名爲教彼善聞教人當如是幻爾旣已知是幻則當塞其實我觀世教師皆謂教其實由是教實故則爲禪所訶禪雖訶乎教終以教致禪禪若不敢教是杜所入門教而不知禪是不識家也辨才真法師於教得禪那口舌如瀾翻而不失道根性湛如止水得風輒燦然心是於東西普福禪教師士女常奔走金帛常圍繞師惟不取故物來不能拒道成盡有數西方一瞬息西方亦非實要有真實處

明原璞法師塔

在龍井

宋濂杭州集慶教寺原璞法師璋公圓冢碑洪武元

年杭之顯慈集慶教寺原璞法師滅度於京城大天界寺其弟子奉靈骨歸窆於郡之龍井辨才塔

南師諱士璋字原璞受生於海寧王氏年十九除
髮元至正十三年主州之棲真教寺棲真與南天
竺演福隣古稱教海法師時往叩焉二十
年移住旌德教寺詩文有別錄若干卷

梁傳大士塔

錢塘縣志在鳳凰山龍華寺

明蓮池大師塔

西湖夢尋在五雲山

詳方外

北山路

唐修真了義禪師塔

錢塘縣志在葛翁井

唐鳥窠禪師塔

董嗣杲西湖百詠詩引在定業院

後太和七年示寂後人發塔惟見碑銘

詳方外

宋三藏道法師塔

成化杭州府志在九里松

宋大智照律師塔

錢塘縣志在靈芝西北

宋瑞光卧塔

靈隱寺志在月桂峰下慈雲大師示

寂時有大星墮地因葬題曰瑞光卧塔

晉慧理法師塔

靈隱寺志在迴龍橋道左

詳方外

慧理大師塔銘

石燕拂雲嶺鷺入吳公錫於飛猿

心可呼安安而思月運雲駛生滅毀成亦復如是

謂公蓋疎雞足與彝謂輪蓋傾鼈足與支幡搖鳥

驚棋積星碍骨妖斯濯黑囊佩虛如梵天宮乘往

當來南紅泗影不騫不摧釋氏稽古畧山有宴坐

之巖號理公巖今瘞塔存焉慧麟瑞慧理祖塔詩

為問開山祖雙猿洞未封全身當谷口一塔壓迴

龍錫掛西天月雷轟鷺嶺鐘欲知真面目溪水盡

朝宗釋山顯慧理開山祖塔詩欲表靈峰異迦維

特地來雙猿呼洞出五寺鑿靈開石塔當溪口全

身聽壑雷到山先
覲面誰慮沒荒萊

後周神尼舍利塔

西湖遊覽志在靈鷲峰頂錢塘縣志

隋文帝始生尼知其貴帝長尼私謂曰佛法暫廢
俟汝而興屬周武廢教尼隱帝家而卒及帝即位
令天下造佛塔而以尼舍利函賚至靈山造塔焉
釋山顯神尼舍利塔詩挿漢浮圖古傳來隋代時
神通仙佛母襁褓帝王兒開市知真主
深宮禮聖師靈山藏舍利斑剥故朝碑

唐無著文喜禪師塔

西湖遊覽志在靈隱山畔詳方

外武林紀事乾寧四年住靈隱歿葬慈光院後遷
靈隱蓋後唐光化三年也歷十三甲子計今順治
七年庚寅七百五十一年山僧作圃種菜闢地九
尺及師缸頂有小鉢破之黑氣冲天良久方散啟
視之則師跌其中前髮僅覆額後髮下垂蔽體脚
指三匝於身手指甲僅一匝笑容如生衣微紅色

按之如灰煙然此
九月十三日事也

宋佛海禪師塔

在靈隱山

周必大靈隱佛海禪師
遠公塔碑師姓彭氏名

慧遠眉山人乾道五年詔住皋亭山崇先寺六年
開堂於靈隱賜號佛海禪師淳熙三年上元安坐
而化是月葬烏峰之塔世
壽七十四僧臘五十九

元輔良大師塔

在靈隱山

宋濂杭州靈隱寺輔良
大師石塔碑洪武四年

正月靈隱釋氏大師滅度報年五十五僧夏四十
用閣維法從事火滅得舍利盈升其弟子以是年
瘞骨於歸雲塔實在寺東偏大師諱輔良字用貞
號介菴蘇州吳縣人姓范氏文正公十葉孫受戒
住天平山白雲寺從笑隱訢公契其心法後
住杭之中天竺預知代期端坐書偈而歿

晉道翊祖師塔

錢塘縣志在乳竇峰

詳方外上天
竺山志崇禎

丁卯夏住持照本重立石牌坊一座題曰晉開山
聖僧道翊祖師之塔縣侯王揚基書額癸酉冬重
加塔門柱檻
琢石新之

隋真觀法師塔

成化杭州府志在天竺東岡靈隱

寺志觀法師葬地久圯宋慈雲募王欽若重修甃

甃甚工

詳見方外楊蟠真觀法師塔詩東岡人不
識野寺在樵漁落葉年年滿春風為掃除

郭祥正真觀法師塔詩宰屠藏真骨東岡氣象殊
煙雲掃不盡苔蘚一痕無釋遵式真觀法師塔詩

五六百年內金軀亦化塵方知新冢上盡是古人
身白髮爭名急青山送骨頻除師靈塔外一一好

沾巾

宋日觀大師塔

武林紀事在天竺山

詳方外范仲淹天竺山日

觀大師塔記師錢塘人姓仲氏名善昇皇祐元年
余至錢塘就山中見之一日遣侍者持書謝余將
去人世必藏於浮圖之下願公記焉又一日侍者
來告曰師化矣其門人藏師於塔銘曰山月亭亭
師之心山泉泠泠師之琴其性存
兮孰爲古今聊志之兮天竺之岑

明慧日大師塔

在天竺山

宋濂上天竺慈光妙應
普濟大師東溟日公碑

皇明奄有方夏有學僧伽奉詔入京數召見字而
不名及建鍾山法會師說毘尼淨戒洪武五年辭
歸杭之上天竺山秋七月朔夢青蓮花生方池中
召弟子曰此生淨土之祥也至四月書頌而寂世
壽八十九僧臘七十二其月藏於山之西峰
妙應塔院師諱慧日號東溟天台赤城人

國朝伯亭大師塔

在法華山之陽

徐自洙伯亭大師
塔誌師初名續法

更名成法伯亭其字灌頂其號也仁和亭溪人俗
姓沈少受法於德水法師戒律精嚴後駐錫上竺

三
卷三
聿新殿宇
厥功甚鉅

謹按吳山在城內向屬禁
地無墓塏故不列吳山路

西湖志卷之二十六

